

四川



郡國利病書

卷六十五至六十七

郡國利病書卷六十五

自成都府錦官驛由府屬之新都軍站

廣漢驛

北由

川州境古店軍站五城驛建寧軍站皇華驛秋林軍站

雲谿驛茂寧府境富林軍站柳邊驛龍山軍站錦屏水

馬驛槐樹軍站施店軍站栢林軍站栢林進運所龍潭

軍站問軍水馬驛沙河軍站神宣軍站神宣進運所抵

陝西寧羗州境為北路自廣漢驛西北由成都府境金

山驛西平驛武平驛口溪驛溪子驛水進驛小河驛三

舍驛抵松潘衛為北路由成都府境唐安驛邛州境白

鶴驛雅州境百丈驛雅安驛新店驛箐口驛黎州境沉

君國和... 卷六十一
黎驛越雋境衛河南驛鎮西驛利濟驛龍泉驛瀘沽驛
建昌衛境溪龍驛瀘川驛阿用驛綠為驛衛川衛境巴
松驛九龍驛會川驛腰驛黎溪驛抵雲南武定府北界
為西南路由府蜀之龍泉驛陽安驛南津驛珠江驛安
仁驛歛州府屬之龍橋驛重慶府界峯高驛東臯驛來
鳳驛白市驛朝天驛渡江油百節驛百渡驛東溪驛安
穩驛播州境松次驛桐梓驛播川驛永安驛相川驛仁
水驛涓潭驛鰲溪驛岑黃驛白泥驛抵湖廣偏橋界又
自湘川驛西南昌曰驛沙溪驛黃平驛抵貴州之興隆
衛界為東南路由成都府境永康驛太平驛寒水驛安

遠驛護林驛抵茂州自茂州折而西北由長寧驛來遠
驛歸化驛鎮平驛古松驛亦抵松潘衛為西路又自錦
官驛連運所水路由成都府屬廣記驛木馬驛龍爪驛
眉州境武陽驛眉州驛石佛驛清和驛峯門驛嘉定州
境平羗驛凌雲驛嘉定州連運所三聖驛沉犀驛丁壩
驛叙州府境月波驛宣化驛真溪驛牛口驛沉川驛叙
川府連運所李莊驛龍勝驛瀘州境江安驛董琪驛納
溪驛瀘州連運所瀘州驛腫艤驛神山驛牛腦驛史洪
驛重慶府境漢東驛石門驛石羊驛夔溪驛銅錐驛魚
洞驛朝天驛重慶連運所未洞驛龍溪驛開市驛涪陵

君國利病書 卷六十一
驛東青驛鄧陵驛花陵驛雲根驛忠州通運所漕溪驛
夔州府境滾途驛集賢驛萬縣通運所巴陽驛五峯驛
南沱驛永寧驛夔州通運所高塘驛抵湖廣巴東界為
東路又自陝西漢中南界水路由九井驛朝天驛問津
驛龍灘驛虎跳驛蒼溪驛盤龍驛順慶府境龍溪驛平
灘驛嘉陵驛宣慶府境太平驛合陽驛上沱驛至重慶
府入大江為北水路又自叙州府水路由馬湖府境羅
東溪泥溪驛入東川軍民府自瀘州境納溪縣納溪通
運所渠渠水驛大洲水驛峽口水驛入永寧宣撫司為
南水路又由永寧永安驛永寧通運所普市驛

摩泥驛赤水驛阿永驛烏撒府境層臺驛周泥驛瓦甸
驛里張驛普德崑驛抵貴州北界為陸路

松潘 威茂 安綿

松疊威茂皆氏羌居之自漢以來叛服靡定 國朝洪
武十一年御史大夫平羌將軍丁玉克服其地設松州潘
州茂州三衛疊溪威州二千戶所洪武二十年併松潘
二衛為松潘衛里民指揮使司宣德四年調成都前衛
後所為小河千戶所增置城堡添調成都利探等衛所
官軍更番戍守先年兵備提督皆侍郎都御史成化初
改設按察使副使總理松茂兵糧後因南路梗塞茂松

不相通又龍州相去遼遠分設松潘威茂安綿道兵備又設鎮守總兵官以侯伯都督充之掛平蠻將軍印成化初改分守副總兵協守左右將軍南路東路二遊擊將軍俱以都指揮充之正德五年添設石泉埧底守備以都指揮體統行事又相潘臚臚地方相隔六十餘里皆有隘口可通北虜嘉靖十一年虜賊深入為害巡撫都御史宋滄議于臚臚後山嶺建靖虜墩西小高嶺建禦寇墩設戍守之嘉靖二十年巡撫右僉都御史劉大謨巡按御史王珩奏設守備指揮亦與都指揮體統行事增官軍二千員名脩築邊牆一萬三千五百三十

深挖坎阱二千五百六十口及于大埧建立一堡西山平埧更脩一墩以防虜騎侵擾之患有四州三近臚臚今阿失寨即上潘州班二簇則下潘州二州之間則中潘州去松不二三日故城遺趾尚在惟松州今為衛軍城屯堡與臚臚諸番犬牙相參原隍之利頗豐雖無屬禁然亦不相侵奪自松達茂不三四百里路循河岸夷碕碕布岩視之如蜂房堡縣有堡過漢索橋則古維烟故城三面臨江殊陡險蓋董卜韓胡宣慰司與雜谷安撫司交界處城與李德裕籌邊樓遺趾尚存舊碑景泰間為叛夷王永所毀州址今為雜谷碕寨迤北則古無

憂城然皆名存寔亡不復為我有也大抵松壘皆夷茂漢夷相半然皆置衛所備守不廢者蓋松疊所以阨塞吐蕃疊則松茂脉絡昔人謂吐蕃入寇必自黎文南詔入寇必自沉黎吐蕃南詔合入寇必于灌口灌口失守則長驅于蜀然則三城邊藩籬灌口疊茂喉襟威茂灌口障蔽峨山全蜀巨屏寔天設險以限華夷者也

松潘則副總兵一員駐劄松潘衛遊擊將軍一員駐劄小河千戶所左叅將一員駐劄龍安府遊擊將軍一員駐劄臙臙屯堡把守指揮五員分督關堡自松潘以東望山關雪攔關風涸關松林堡紅崖關三舍堡鎮遠堡

小關子堡松子堡三路堡師家堡四望堡抵小河千戶所蜂崖堡華塘堡馬營堡水進堡鎮夷堡鉄龍堡抵龍州宣撫司又自松潘以南紅花屯堡熊族屯堡西寧關山屯堡安化關鎮草堡新塘關艾蒿堡歸化關北定關蒲江關平夷堡金瓶堡鎮平堡鎮審堡靖夷堡平定堡抵疊溪界又自松潘以北穀粟屯堡高屯子堡坐裕屯堡唐舍屯堡譚邨屯堡臙臙屯堡抵吐蕃洮河界以上關堡并墩臺共八十七處戎守主客官軍舍餘遊兵共一萬一千六百八十四員名每歲額堂松潘等一十一倉糧米共九萬九千三百八十石有奇按松潘乃西蜀

之重鎮諸番之要區東連龍安南接威戎北抵胡盧西盡吐番西北又與洮岷連壤鎮城衙門關堡之外四面皆番故 畧者謂蜀之各鎮惟松潘純乎邊者也萬曆六年兵備副使楊一桂以人荒沒舌去骨等寨番民皆年侵擾備陳十款一曰鷓除惡寨二曰充寔行伍三曰議處充發四曰揀撥戍守五曰革去遊兵六曰定委要害七曰聯絡墩堡八曰設立州場九曰招復叛亡十曰年終獎戒呈允施行切中邊

茂壘則有叅將一員駐劄茂州 有茂州衛遊擊將軍一員駐劄疊溪千戶所各路把守指揮五員分督關堡

自茂州以北鎮戎堡椒園堡長安堡韓胡堡松溪堡長寧堡穆肅堡寔大關新堡馬路堡小關子抵疊溪千戶所北行至漢關墩新橋堡普菴堡太平堡永鎮堡抵松潘界又自茂州小東路上地嶺堡鎮夷堡關子堡神溪堡土門堡桃平堡抵安綿界又自茂州南路遷橋墩黎蘭頭白水墩藍盃頭獨脚門樓瞰遠墩四顧墩革毛坪立星墩文鎮撫材人宗渠石鼓村七星關雁門堡青坡堡抵威州 有千戶所至岷川堡撤底圍抵灌縣界又至威州西路則保子關坡底堡堪州堡乾溪堡并墩臺新安堡抵保縣保縣堡四圍皆番境以上關堡并墩

臺共一百二十處戍守主客官軍兵快羌番共一萬四千二百五十二員名額坐廣備等二十四倉糧米一十萬三千九百一十七石有奇

安綿則守備指揮二員以都指揮倅統行事一駐劄石泉縣一駐劄平番堡把守指揮四員分督關堡所屬各路曲山關擗鼓坪堡後在堡香在溪堡疊溪堡西溪堡靈鷲堡睢水關視曹堡綿堰堡馬尾堡白水堡龍搆堡三汧堡觀子堡徐平堡平通堡大方關大印堡茅堆堡山茅堡捺塘堡埧底堡石坂關石泉堡白印堡青岡堡石泉城上雄關平番堡奠酒亞堡赤土坪堡共二十五處

戍守官軍兵快共六千四百五十二員名額坐大印等食糧米共三萬一千一百一十八石有奇嘉靖二十三年遊擊周庚妄殺討賞番人著兒拓等二十四年白草莽一十八寨番蠻聚衆于羊角白泥一帶劫掠攻克平番奠酒二關截占漩平以阻石泉兵糧之路巡撫都御史張時微督同副總兵何卿調集官兵討平之

王廷相嚴茶議

蜀中有至細之物所寓莫大之用君子不可以輕視之者茶是也五穀饔飧非不美也食牛羊乳酪者則不以為急布帛帷帳非不麗也御穹廬玷裘者則不以為重茶之為物西戎吐蕃古今皆仰給之以其腥肉之食非茶不消青稞之熟非茶不解故不能不賴于此是則山林草木之葉而閔繫國家政理之大經國君子固不可不以為重而議處之也蜀茶自唐主播始榷稅以利國宋初則買茶于秦鳳熙河等路博馬又置茶場于成都買茶貿易取息以為熙河博馬之費建文以後罷成都

茶場設買馬二務一在成都買川馬一在興元買秦馬
元權成都茶于京兆鞏昌治局發賣惟取其利我朝
洪武中川陝皆置茶馬司收已茶易馬頗獲其利至成
化中議者以馬之用急于三邊而川馬遠不可至茶之
利分于川蜀而洮所河利則微故川中茶馬停止而獨
行于河州是以川茶惟嚴禁約而諸番無以仰給矣近
年以來法施人玩雖有禁茶之名而無禁茶之寔商賈
滿于閩隘而茶船遍于江河權要之人每私主之以圖
利迹者巡按盧公稍一盤詰即得十數餘萬則其平日
可知也夫茶可以利朝廷也今利歸私門矣可制諸

番之命也今仰望于商人矣以中國御番之大權而倒
持以授之于商賈不惟自失其利國之具而反害之矣
為今之計莫要于嚴私茶之禁絕商賈之販使茶利之
權在官則諸番可以坐制何也茶者番人之所必欲得
者也私茶不行番人仰于官矣以茶易馬雖不可遽復
而使之輸青稞以服役獨不可乎或者曰青稞之輸彼
之舊寶也茶則我之寔利也彼來貢之我以是賞之不
幾于相易乎彼之利于我者微而我之共其利者大不
幾于失倫矣于是皆以小利言之不知彼輸于我義也我
賞于彼德也我因以行其羈縻之道彼亦以為職分之

當久之邊防可以寧謐而我兵亦無調度之費戰伐之苦以此較彼所得孰大小哉夫番仰茶于官權在國也邊鄙因之無虞利在民也一禁茶之間使權歸于國而利及于民較縱禁通商使利歸私室而害及于邊者所得又孰多寡哉

蜀中雜抄

岷嶓潛沱之義難解今蜀山連綿延亘凡居左者皆曰岷右者皆曰嶓凡水出于岷者皆曰江出于嶓者皆曰漢江別流而復合者皆曰沱漢別流而復合者皆曰潛恐屬方言耳故岷謂之汶今汶川是也漢謂之漾或謂之沔或謂之羌今沿漢水而東有寧羌州有沔縣又東有洋縣即古洋州也洋漾聲相近豈皆得名于漢水云乎

按華陽國志云漢有二源東源出武都氐道漾山因名漾禹貢流漾為漢是也西源出隴西嶓冢山會白水經

葭萌入漢始源曰沔故曰漢沔

成都學宮前綽楔題曰神禹鄉邦余始至視學見而疑之昔堯舜禹嗣興莫為中州南河之間聲教暨焉而輿地尚未拓也後千餘年而周始有江漢之化至秦盛強而蜀始通焉彼所謂蠶叢魚鼈靈望帝者文物未備且在哀周之世蜀之先可知也禹都在今安邑鯨寔四嶽封為崇伯崇今之鄆縣其地遼絕何得禹在于此乎新志亦以此為疑問之人士皆曰禹生于汶州之石紐村禹穴在焉檢舊志稱唐元和志廣柔縣有石紐村禹所生也以六月六日為降誕云是蓋幾于巫覡之談至宋

計有功作禹廟碑始大書曰崇伯得有莘氏女治水行天下而禹生于此其言頗為無據有莘氏于鯨亦不經見按莘今之陳留 崇 鯨娶當或有之鯨為諸侯厥有封守九載弗績多在河北今諸處之鯨城是已安得治水行天下乎又安得以室家自隨荒裔之地如石紐者乎余蓋疑之雖有功亦曰稽諸人事理或宜然蓋疑詞也此必承元和志之誤而後說益紛々矣此雖于事無所損益而蜀故不可以不辨按楊農蜀止云

禹治其江左思三都所賦人物竒若相如君平文若王褒楊雄恠若萇弘杜預僭若公孫劉璋皆列獨不及禹

生耶至宋王騰不平左調作賦致辨頗極詞鋒亦云岷山導江歷經營于禹蹟其後云鯨為父而禹于此槩人倫之辨尔亦不言禹所生也又按華陽國志載禹治水命巴蜀以屬梁州禹娶于塗山辛壬癸甲而去生子啟呱々啼不及視至過其門而不入室務在救時今江州之塗山是也帝禹之廟銘存焉志作于晉常璩可謂博雅矣况苗意蜀之材賢然亦不云禹所生也今徒以石紐有禹穴二字證之又安知非後人所為耶禹穴寔在今會稽窆石存焉古稱穴居衆詞也禹平水土時已為司空恐不穴居今言穴蓋葬處非生處也古今集記則

云岷山水源分二派正南八溢相至石紐過汝川則禹之所導江也由是言之石紐蓋禹績之始而非謂禹所生也又按塗山亦有數說江州今重慶之巴縣有山曰塗鳳陽之臨淮古鍾離也自有塗山啟母石在焉江州治水所經鍾離帝都為近未知孰是蘇又云塗山有四皆禹蹟也併指會稽與當塗云宋景濂遊山記甚詳然亦不能決孔安國曰塗山國名非山也史記所載啟禹之子其母塗山氏之女又似姓氏猶今司馬氏歐陽氏之謂恐非國名也即附所疑於此

利州

鄭剛中思耕亭記

嘉陵之源發于鳳之大散亭由故鎮繚繞漁閼循崖而出力未能載自漁閼下武興浮三泉南流二百六十里至于亭下又順流入閼東走安漢疾趨于合之漢初則會東西二川併勢望夔峽之道爭門而出回視漁閼不知其高幾里皆終歲漕向之所浮水既不得平流皆因地而淺深自灑預逆數至漁閼之樂水號名灘者六百有奇石之席伏獸奔者又崎嶇雜亂于諸灘之間米舟相衛旦晝犯險車破大竹為百丈有力者十百為群背

負而進灘怒水急激號呼相應却立不得前有如竹斷
舟退其遇石而碎與汨俱入者皆蜀人之脂膏也小人
特有此頗復濫用官米度贖厚罪大則鑿舟沉之歲陷
刑辟與籍入亡家者亦累，而有故漕粟之及漁閔者
計所亡失常十二吾然後知田之不可不畊也武侯以
草廬素定之晝頻年兵出皆以食盡而歸則西南轉餉
之艱蓋千古矣吾君誠心善憐邊鄙不慎命外中以寬
厚之澤蕩洗煩苛塞卒十萬今皆橐弓掩甲而卧吾誠
能借其餘力雜畊閔外卒以平歲縵田為準不計糧戾
第得粟一鍾即成漕粟三鍾之力俟諸營儲食能如晁錯

所為足支五歲則時赦農租當下天子之詔凡此皆某
臨流之所深念者

三十一

峩眉縣

鹽法自古有之逮管子以是而富國吳王以是而禁民
 法網遂密小民不得恣其欲矣然皆以煮海為利所出
 無窮所入亦無窮若西蜀所煮者不過一盞井耳濬之
 甚難非二三十文不可竟業取之甚苦非四五六日不
 可貯鹽且所煮之數不足其償以所稅之數峩眉舊原
 無井即間有一二隣接縣境近皆竭塞杜涸今于民糧微
 派乾賠每年納鹽課銀三百七十六兩零五分三厘民
 窮固甚可憫而 國課又難驟蠲反覆籌之無所措置
 有司徒具熟腸其轉移軫恤之權寔自上撻也

按自裁眉而去為龍池為中鎮為獾狃地多產銅鉛木板亦有銀鑛若不可得推埋為奸誘人入山鬻與夷為奴獲牛馬厚利將鬻時鉗其首塗以漆令牧牛羊并六畜每日以蕎麥餅充餐又冇名為土老受雇工值為人捺小舟送木片出灘再險落下如入阱中土老與小舟同入水須臾并浮出然南溪叙戎之民以誘畧為業故須簡司帶弓兵鎮守

建昌沿邊諸堡

建昌衛所屬紙房堡盧州堡高山堡沙坪堡德力堡黃泥堡建昌前衛所屬青山堡松扶堡平蠻堡鎮夷堡寧番衛所屬瀘沽關鉄廠堡北山堡太平關冕山堡巡哨堡李子坪堡雙橋白石堡三橋關越雋衛所屬青岡堡蒼葉堡木瓜堡鎮遠堡坪琪堡苦菓堡平夷堡八里堡河南堡晒經閣堡白馬堡銷蛮堡李子坪堡臨河堡砂來關小哨堡長老坪堡洳水堡新添堡黃泥堡九盤堡會川衛所屬席頭關司沙關達郎關鹽井衛所屬箐口堡雙橋堡涼山堡鴛鴦堡新添堡馬蟻堡土功堡雙橋

堡抗州堡紹興堡六為堡鎮南堡定遠堡鎮西堡新化
堡明遠堡濟平堡康寧堡共六十二處各于本衛撥軍
守備成化二年設建昌兵備道副使十六年設分守太
監嘉靖四年設守備官一員以都指揮體統行事守備
寧越地方駐劄鎮西守禦千戶所嘉靖七年又設守備
官一員亦以都指揮體統行事守備黎雅地方駐劄雅
州守禦千戶所嘉靖十年巡撫都御史宋滄巡按御史
邱道隆題奉 欽依取回分守太監蓋建昌一鎮土沃
物繁雖孤懸一隅而漢夷相安較之松茂邊情萬々不
相侔隆慶三年改建昌兵備副使為兵糧道兼管分巡

督理糧儲隆慶六年逆酋安文等因與土官瞿氏爭釁
統率夷賊首惡阿貴佐擢栢白牛蘆阿々支撒他等臨
城攻搆擾害地方萬曆元年四月十九日文等率各夷
蠻劄住木拖村四郎阿等震虜劫人財建昌道兵備副
使楊芷會同兼理判王爵牌行各衛官齊集兵夫人
等嚴守城池先令旗軍周英等前去安文等賊營宣諭
利害陽為撫安以便整擄將原募兵勇八百餘名分劄
城關要害調取土舍安鎮土官家丁逆止孺姑咱計姑
撒刺各率部兵馳赴土官阨南門橋截殺各賊恃其党
衆于本月二十一日突至本司城下芷親督兵驅戰授

以方畧官兵奮勇截殺擒斬數百人奪獲甲馬器械若干自是夷虜既遭懲創始知國法而建昌六衛軍民得安枕矣萬曆三年巡撫都御史曾省吾巡按御史郭莊題奉 欽依將建昌前衛併入建昌一衛

建昌兵備鄧 條議

建夷負固一隅蠻煙瘴癘自大渡河起至金沙江止一千五百六十里皆危坡峻嶺而五衛八所各據要領又皆與西番東徠百十餘寨掣肘為隣我漢人所藉以往來者止有一線鳥道迴繞曲屈殆三千餘里以三千餘里之鳥道經百十寨夷之隘口雖有營堡稀若晨星豈

能保無疎虞此其無月無日無時無刻而皆當為防五衛八所每歲額辦屯糧五萬石村屯星散既不能如松松潘之歸一兼以前歲大舉比之遵義兵不滿四萬限不過五月元兇難以授首逋首豈能盡殲伏莽假息尚繁有徒 建南堡全蜀藩籬查蜀志唐天寶以來南詔歲為邊患大曆十四年十月南詔合吐蕃師一十萬三路入寇而一路自黎雅過邛崃關陷諸郡邑太和三年復陷邛雋逼成都劫子女玉帛以去咸通十一年冬蠻賊圍成都天下如雨蜀地大震十四年又入寇造浮橋濟大渡河至新津而還明年始脩復邛徕間大渡河諸

城柵內地稍戢至宋藝祖以玉斧畫大渡河而邊患遂與宋祚相終始自大渡河起至金沙江止計備舊營五十六處增新營七十七處共一百三十三營堡夫邊職之漢夷並設也謂九種醜類非兼土司不能聯屬也查國初寧番土酋怕兀他從月魯帖本兒為亂我太祖命總兵徐凱征討遂廢土改衛止將環居西番編為四圖聽我羈縻會川益井難設土職大頭狀皆各有分土不甚鴛鴦越嶲邛部土官嶺栢應自嶺鳳起構淮移之栢香坪今可無慮獨建昌安土官雖有總轄之名號原無一定之寨分先年舊居衛城萬曆丙戌每夜

出城劫村甚者左右兩所官軍不堪荼毒至有卒衆攻城以討賊者丁亥周憲副光錫請于兩臺奏調漢土官兵剿伐始定雖將土官移居于城外之東衛第去衛城不數步夷了出入終不能禁此所謂腹背之一大疽也查安民世職以來安華安仁安夷安忠四世相承謂夷猶多懾服嘉靖末忠妻氏權揖夫職是以成尾大之患夙氏死踈局安登冒嗣夷心不服是以有廝養卒逆止之變安登以其妻瞿氏紹良更無能節制是以安又頻歲為叛至有臨城劫掠之慘瞿氏紹良死安世隆嗣而其妻性愛以踰城淫奔為安世隆所逐又為郡奴力

怕等復煽諸夷擁沙爰為主共與世隆相仇殺是以招
本邊不了之禍今安崇業又以遠枝承繼其性狡狴近
者奉 旨勦勦屢漏洩賣放及聞善後苗兵益鞅之不
樂每日垂頭喪氣如有所失此苗不死建南之禍未息
也茲幸天斬其嗣據建昌通學生負僉呈乞停土官之
繼仍復 國初責成四把事約束之例以絕禍本以救
邊民第土嗣雖絕尚有土婦先年夫亡妻繼之規倘瞿
氏不鑒覆轍則異日娶嗣已絕即不議繼可也矧四把
事原同土官管束部夷者彼皆係籍夷種熟知夷情
今其弟男子姪又多入泮局我編氓倘四把事果堪約束

可以代土官之責更為駕馭之便本邊自善後滇蜀
之路大通商賈絡繹即五衛耕屯趕脚之夫亦往來如
織每一瘡發道理相藉其最慘者曰大渡河曰金沙江
曰甸沙關而甸沙關二三百里驛站甚長

重夔

重夔二府去會城頗遠所屬達東大平大寧太昌等州
縣山深地曠流移逋逃易于嘯聚為盜正德間群盜藍
廷瑞鄂本恕廖麻子等相繼倡亂為蜀中大害又所屬
黔江武隆彭水忠培建始奉節巫山雲陽等州縣界與
湖廣之施州衛所轄散毛施南、崖中路等夷司大牙

交錯加之播酋石柱等司土漢相雜爭鬪劫害無歲無之宏治元年設兵備副使駐劄達州統辦重慶黔江并湖慶瞿塘施州忠州等衛所而達州東鄉太平三縣州又調聚重葭新寧梁墊長壽銅梁合巴蓬渠營山岳池鄰水大竹等衛所州縣軍快共一千名團操防禦嘉靖十年于黔江千戶所與散毛宣撫等司交界設立老鷹等三關五堡就于該所摘發官軍守把嘉靖二十年改調九永守備官一員于施州衛駐劄約束散毛施南中路等司蠻夷兼制酉陽石柱二宣撫司石耶邑梅二長官司黔江守禦千戶所并聽川湖守巡官節制嘉靖末

大足縣民蔡佔貫以幻術愚衆攻破合州定遠等州縣黃中盜據雲萬山中旋即剷除萬曆初添設捕盜通判一員

兵備副使張儉麥子山議 麥子山延袤數百餘里東抵湖廣當陽房竹及本省寧昌等縣北隣陝西平利及本省東太等縣西南三面與本省奉節雲開等萬連連界內有紅線岩節羅堪粟子岩雙古墳四處原有古砦舊基可容百萬餘人壁立萬仞四面俱是懸岩止有一線之路可通上有平田古井足供衣食山腰天生石門一座若被賊把守再無別路可登山內雖有新舊居民

千有餘戶但地廣居散力分勢寡難以守禦况北連萬
頃柴山常有各省流民一二萬在彼砍柴以供大寧鹽
井之田一遇飢荒即投入山據險流劫尤為可慮今于
石門雙古墳篩羅堪等處通賊要路設立關堡鄰近居
民編為夫甲輪流守把杜賊入路

巴通

通江界秦蜀之境蕞尔孤城設在萬山間崇林絕嶠一
睇數百里夙號巨寇出沒之藪成弘間鄆藍猖獗陷破
城邑都御史林彭先後提師數年始平嘉靖間何賊倡
蹶據險糜費兵勤三省凡四載始議招安至隆
當宁

西顧今萬曆丁巳秦中黠叛唐王輩嘯聚山林竿旗挺
刃剽殺生民掠男女畜物金帛器用歸窟秦山旋歸旋復
至山中狡猾亡賴子多從之當路遣守脩邨起龍斬首數
十級

國初吐蕃播州西陽石砭永寧平谷石耶色梅諸部咸
以土人領之蓋以夷治夷不致煩中國意也獨芒部等
四軍民府假之名號兼設流官豈以聲教漸被猶可從
漢道處之耶曩歲都蛮剽平迺則建昌底靖各土夷畏
威順治及芒部改為鎮雄隴氏未復寔授懲創方切悔
艾可知而東川烏蒙二府又復凋弊孱弱自植弗暇羈

君國和痛書
卷之六
二
勢為宜外惟烏撒岨強一隅往來侵掠隣夷蹈為奸利
視諸番高最奢羅等部反有意外之虞豈其習使然哉
亦有所恃故耳蓋其地有鹽池銀礦之利藏亡舍死率
以為常勢不勻弊不止也故議者謂永寧叅將施靈二
守備皆切要慎重之地而叙瀘重夔二兵備其防尤不可
緩焉建南雖未即開設郡縣近今條畫善後庶幾少
安水蘭之役外構內訌默中復主偏聽頃賴兩臺 題
奏處分已要顧險阻易為憑陵犬羊不難動所為建
堡設險練兵貯積上則調停攻心以成羈縻恩威或
未可偏也

夔州志云萬縣南岸一帶地方壤接施夷各土司環列
四境蜀漢時置南浦縣後代因之至元省入萬州相去
遠絕民又頑獷乃致奸巧之徒鼓扇其中故黃中之亂
殆有壤而成之者中雖剽平而處置未妥其間狡獪之
民動犯法禁稍聞捕緝即徙入夷名曰殺崗開引土夷
劫掠我人民侵奪我畜產又施南富豪惧夷侵掠私據
險要築堡自守名曰立寨因見地方廣遠兼恃家丁豪
強不供租庸不復拘喚查得先年黃中既平之後經該
院道酌處地方蓋後事宜有議復南浦縣治以綏邊民
者有議委捕盜通判駐劄黃荆堪者自今觀之復舊縣

者久安長治之策也。議捕守者安內攘外之攘也。

卷終

郡國利病書卷六十六 蜀中風俗記

漢地理志云人食稻魚俗不愁苦而輕易淫佚然地沃人驕奢侈頗異人情物態別是一方

隋地理志云蜀地四塞山川重阻水陸所湊貨殖所萃蓋一都之會也風俗大抵與漢中不別其人敏慧輕急貌多叢陋頗文學時有斐然多溺于逸樂少從官之士或至者年白首不雖鄉邑人多工巧綾錦雕鏤之妙殆侔于上國貧家不務儲蓄富室重于趨利其處家室則女勤作業而士多自閑聚會宴飲尤足意錢之戲小人薄于情理父子率多異居其邊野富人多規固山澤以

財物雄浚故輕為姦藏權傾州縣此亦其一死也
益部耆舊傳云楊統曾祖仲續舉河東方正授郫令甚
有德惠人為立嗣樂其風俗于是居焉漢書楊雄之先
楊季官至廬江太守元鼎間避仇遡江處岷山之陽曰
郫有田一廛有宅一區世以農桑為業其俗之隩原
可知也溫江如郫所分益州記云彭之土地肥良比于
郫邑號小郫矣江原之地特好美田葛公云益州所需
悉仰于蜀即此華陽國志稱其俗好歌舞危絃促管聲
尤激切而游陸謂唐安有三官柳四十琵琶也永康圖
經其俗則悍頗尚氣節而雜夷風男西五十里有蚕崖

關以阨西山之走集而邊激從此分矣
威茂古冉隴也土地剛自不生穀粟麻菽惟以麥為質
自古及今並無兩稅寰宇記云州本羌戎之人好弓馬
以勇悍相高詩禮之訓闕如也男子衣羯羊皮鞞犴
人多戴金花串以瑟瑟而穿貝珠為飾疊石為磔以居
如浮圖數重門內以梯上下貨藏于上人居其中畜園
于下高二三丈者謂之雞籠十餘丈者謂之碓亦有板
屋土屋者自汶川以東皆有屋宇不立碓巢豹嶺以西
皆織毛毳蓋屈如穹廬其地多冰寒盛夏凝凍不釋夷
人冬則避寒入蜀傭賃自食夏則避暑反落歲以為常

君國和病書 卷之六
故蜀人謂之作五百石子也西入松州苦寒特甚日耕
野壑夜宿碣房刻木契以成交易矣羊膽以斷吉凶人
人精悍習戰鬥矣

簡州治陽安宋閔耆孫碑陰記云東晉慈西成都有東
之朴有西之文蓋嘗出磊落瑰奇之士焉紹興黎特道
院記云陽安都于會府而有江山之勝處于高仰而有
魚稻之饒民事獄訟比之旁郡十無一二凡隱于吏者
樂趨焉人目之為西州道院寰宇記云郡有獠人言語
與夏不同嫁娶不同但鼓笛而已遭喪乃以竿懸布置
其門庭殯于別所至其体骸慘以木函盛置于山穴中

按李鷹云北四郡獠也而今則文質彬彬矣

資中或治盤石或徙內江皆謂之中水也圖經云王褒
起資中以文詞顯于是東梓為多士之國劉光祖記云
蜀東十數郡山水之秀不敢與資中抗文物亦狀

陵州以鹽井為業以道陵得名丹淵集云州在崎嶇山
谷之中城壘邑屋與蠻嶺澗壑相為上下所領縣四戶
口裁三萬稅錢止千三百緡租不滿萬石土田瘠鹵民
頗善耕稼然其性椎質各守護本業不喜作訴訟事又
郡縣志云俗愿慤而好靜公議而無私有古淳質之風
今亦恐漸訛矣

漢益州或治廣淇或治綿竹古語云大旱不旱蜀有廣漢蜀記云浸以綿維故廣漢謂之淵府也新都與成都廣都各為三都之一故號名城兼有金堂山焉綿竹以姜詩力孝宅曰沅鄉以任安教授俗侷洙泗德陽有望秦之望里彰章明有廉遜之泉皆以人重也

郡國志云左綿界東西二川北負梁雍風氣所濡各得其偏故其俗文而不華淳而不魯剛而不佞柔而不弱三國志先主入涪宴于山上顧謂龐統曰此州之民其富樂乎陳谿唐昌州市記曰諸葛武侯以蜀胜脆故今隣邑翊日而市意在習其勛力而俟征徭之又每及上

春以蠶為名因定日而有所往也

寰宇記云龍州風俗與劍州同然山高水峻人多瘠而痴聾蓋山水之氣使然

江油今許醇民謠序所向皆山石少平陸罕穀稻人皆仰食于綿劍隣邑舊經云岩居谷處多學道經罕有儒術

嘉州教授任熙明題名記云蜀為西南巨屏黷漢以來號為多士莫盛于眉蓋二邦而嘉定次之張剛通義圖序云後世以蜀學比齊魯而蜀之學者亦獨盛于通義政和御筆西蜀惟眉州學者最多脩譙樓記云其民以

詩書為業以故家文獻為重夜燃燈誦讀教浪々相聞矣

蘇軾遠景樓記云吾州之俗有近古者三其士大夫貴經術而重氏族其民尊吏而美法其農夫合耦以相助蓋有三代漢唐也遺風而地臨莫之及也始朝廷以毅律取士而天聖以前學者猶襲五代之弊獨吾州之士通經學古以西漢文詞為宗師方是特四方指以為迂洵至于郡邑胥吏皆挾經載筆應對進退有足觀者而大家顯人以門族相尚推次甲乙皆有定品謂之江鄉非此族也雖貴且富不通婚姻其民事太守 具令如古

君臣既去輒畫像事之而其賢者則記錄其行事以為口寔至四五十年不忘富商小民常儲善物而別異之以待官吏之求家藏律令往々通念而不以為非雖薄刑小罪終身有不敢犯者歲二月農事始作四月初吉穀稚而草壯耘者畢出數十百人為曹立表下漏鳴鼓以致衆擇其徒為衆所敬畏者二人一人掌鼓一人掌漏進退坐作惟二人是聽鼓之不至々而不力皆有罰量田計功終事而會之田多而丁少則出鈔以償衆七月既望斬艾而艸衰則仆鼓而決漏取罰金與償之錢買羊釀酒以祀田祖作樂飲食醉飽而去歲以為常其

風俗蓋如此故其民皆聰明睿智務本而力作易治而難服守令始至視其言語輒了其為人其明且能者不復以事始終日寂然苟不以其道則陳義秉法以訕切之故不知者為難治云

文同桂花閣記畧云邛為要州服物繁縟俚師陋士亦備文采章逢彬蔚寔逾于他邦矣

華陽國志云秦惠文始皇克定六國輒徙其豪俠于蜀資吾豐土家有鹽課之利戶專山川之材居給人足以富相尚故卓王孫家僮千數程鄭各八百人簫鼓歌吹擊鐘肆懸富侔公堂豪過田文漢家食貨以為稱首蓋

亦地沃土肥奢侈不期而自至也宋上行曰此郡昔有四利今有四害曰茶曰鹽曰酒曰鐵他郡或有其一或有其二而吾邛獨全昔以為利國競豪富今以為害民皆貧薄矣

梁益志云大小漏天在雅州西北山谷高深沉晦多雨舊說黎州常多風雅州常多雨故謂黎風雅雨九州要記云沉黎縣即諸葛武侯征羌之路也每十里作石樓令鼓聲相應今夷人做之所居悉以石為樓地多長松而無雜木孫漸清嘯樓記云襟帶邛窄羈縻諸蕃郡縣志云宋初曹光寔父子能以忠義奮迨皇祐始有登科

者

寰宇記云黎州蕃部與漢人博易不使見錢漢用綉絹茶布番用紅椒鹽馬又云邛雅之夷獠婦人娠七月而產、畢置之水中浮者取養沉者棄之千百無一沉者長則拔去上齒加狗身以為華飾今有四牙長于諸牙而唇高者別是一種能食人無長齒者否俗信妖巫擊銅鼓以祈禱至今蘆山縣新安鄉五百餘戶即其遺人也

叙南古戎州取西戎即叙之義蜀人呼叙為遂不知何所本華陽國志稱其民徵巫好鬼妖圖經云夷夏雜居

風俗各異蓬戶茅簷髻髻詭服頓首拊掌為歌

江陽土地雖迫山川特美鹽井魚池一郡豐沃華陽國志云俗好文刻少儒學多樸野蓋天性也漢光武時被謫不使冠帶者數世其後文風則自宋尚書楊汝明始創五峯書院以為士友會課之所而士翕然興起矣戎瀘皆有諸葛武侯廟每歲蠻人貢馬相率拜于廟前慶符有順應廟乃祀馬謖者歲以三月二日致祭馬湖之夷歲暮百十為群擊銅鼓歌舞飲酒窮晝夜以為樂其所儲蓄弗盡弗已謂之諸葛窮夷法

寰宇記云大凡蜀人風俗一同然邊蠻界鄉村有獠戶

即異也今渝之山谷中有狼狽鄉俗搗屋高樹謂之閣
闌不解絲竹惟坎銅鼓視木葉以別四時父子同諱夫
妻共名祭鬼祈福是所異也

華陽國志涪陵山險水灘人性慇勇多獯蚩之民縣邑
阿党闢訟必死無蚕桑少文學漢時赤甲軍常取其民
蜀水相亮亦發其勁卒三千人為連弩士其性質直雖
從他所風俗不變

巴子之時陵墓多在枳在蓄牧在沮今東突碇下畜沮
是也不立市于龜亭北岸今新市里是也龜綾志云風
土煦煖五月半旱稻已熟便可食新七八月間收割已

畢故有樂溢之號

水經注云平都縣有天師治兼建佛寺甚清靈且有市
肆四日一會南賓郡所轄也忠州題名記云有巴蔓子
伏即夔之遺風焉故士頗尚氣有甘与霸文廣林任
俠之餘烈故士多倜儻黃魯直四賢閣序云郡自開元
以後迄于會昌劉士安陸敬與李宏憲白禁天四君子
者相繼出守凜然猶有生氣忠名每以此自負而郡守
至者必矜式焉

黔州固經地近荆楚候如巴蜀五襟溪帶為一都會路
途濶遠亦無館舍凡至宿泊多倚溪岩就水造殮鑽太

出火黃魯直與秦太虛書曰某屏棄不毛之鄉以禦寇
魁耳目昏塞黔中一老農耳其作縣題名記云黔江縣
治所蓋未開黔中郡時歌羅蛮聚落也于今為縣二鄉
七里戶千有二百其秋賦傭催不登三十萬錢以他產
役于公者八十有五其義軍二千九百招諭夷自將其
衆者五百七十其役于公之人質野畏事大畧與義軍
夷將領不殊也使之非其義或跳梁不為用決訟失其
情或擄掠以償值暗則小智者亦混疆畔而為欺懦則
細黠吏能用其柄市麝臍以百計市蜂蠟以千計貧則
夷以長吏為侮寬則以利啗胥徒而苟免猛則鳥獸駭

而走箐中矣至今得其人搗垢爬痒民以安堵而異時
號為難治吾不知其說也

常璩志郡與楚接人多勁勇少文學有將帥才宋何郯
夫子殿記云夔為州于巴東最大其風俗嗜好語言較
荆楚不甚遠當列國時楚顯者多良才夔為楚疆至今
未聞有用儒顯者民家子弟壯則逐魚鹽之利富有餘
資輒以奉祀鬼神它則不暇知耳李貽孫都營府記云
其人豪其俗信鬼其稅易征其民不偷也

宋肇詩序夔冬煖雪不到地惟山高處白杜詩注云峽
土峽确煖氣既達故民燒地而耕謂之火耕

開州都梁南浦雲安皆漢朐腮縣也注云其地下濕多
朐腮蟲故名此蟲為瘴善中人避之則吉盛山學記云
土以績文相高有溫造柳公綽之餘烈梁山軍題名其
民未嘗造難聽之訟以混有司守居蕭然閩甸無訟牒
至廳下軍西之田獨平行可耕前涪後峽扶以夔萬皆
崇山環委南浦記云土地多泉民賴魚罟西魏于此置
魚泉縣也

通州圖經云水航于蜀陸肩于雍樓雉丹漆廛用珠玉
土居十萬戶水居三千戶九域志載男女不耕桑貨賣
用雜物以代錢常氏馬鳴山志稱其持金易絲泉者不

絕于道矣

大寧監圖經云一泉之利足以奔走四方吳蜀之貨盛
萃于此監地接朐腮多瘴土人以茱萸煎茶飲之可辟
嵐氣以其味辛名曰辣茶題名記大寧僻在東南軒冕
者寡而封畛之內皆樂善之編氓也

夫竹枝者閭閻之細響風俗之大端也四方莫盛于蜀
蜀尤甚于夔杜子美白帝詩云破醴蒸山麥長歌唱竹
枝萬州圖經云正月七日鄉市士女渡江南蛾眉磧山
作雉子卜擊小鼓唱竹枝歌開州志云俗重田神男女
皆唱竹枝巫山志云琵琶峰下女子皆善吹笛嫁時郡

女子治具吹笛唱竹枝詞送之則夔俗比。如是矣。劉禹錫竹枝詞九首序云四方之歌異音而同樂。歲正月余見建平里中兒聯歌竹枝吹短笛擊鼓以赴節歌者楊袂雕舞以曲多為賢聆其音中黃鐘之羽卒章訐激如吳聲雖儉停不可分而含思宛轉有淇澳之艷音屈原居沅湘間其民迎神詞多鄙陋乃作為九歌至于今荆楚歌舞之故余亦作竹枝九篇俾善歌者颺之附于末俾後之聽巴歌者知變風之自焉

遵義圖經云其俗敦龐淳固以耕植為業鮮相侵犯天資忠順志慕華風

元史地理志云夷夏雜處遵文教守禮法夷椎髻披毡以射獵伐山為業信巫鬼好詛盟

方輿勝覽云累世為婚姻以銅器砧刀弩矢為禮燕樂以銅鼓橫笛歌舞為樂會聚貴漢服出入負刀弩交易與華人不侵此亦屬縣之大較也

應劭風俗通云閩中有渝水實民多居水左右天性勁勇初為漢前鋒陷陣銳氣喜舞帝善之日此武王伐紂之歌也乃令樂人習學之今所謂巴渝舞也隋書地理志稱其風俗與漢中不別質朴無文不甚趨利雖蓬室柴門食必兼肉好祀鬼神尤多忌諱家人有死輒離其

故宅崇重道教猶有張魯之風焉每至五月十五日必以酒食相饋賓族聚會有甚于三元時按蒼溪志北八十里有岐平鎮每五月初間四方商賈輻輳貿易以萬計號為岐平會亦古今相沿之槩也

宋太守李猷卿南樓詩序方地暖氣清民淳事簡馮忠恕記云其地平行而沃其民恭儉而文在西南為佳郡不減成都

利州圖經呼為小益對成都為大益也舊志云自城以南純帶巴音由城以北襍以秦語

漢李尤蜀記蜀山自綿谷葭萌道徑險窄北來擔負者

不容易肩謂之左擔道故少陵愁坐詩云葭萌氏種迫左擔犬羊存

保寧一府四月新絲出輸縣官緡過此則逋負矣俗因謂之蚕糧

十道記云廣漢之地有鹽井銅山之富蔬食果寔之饒此後漢馮灝刺奢之說所由作也玉堂遺範授高瓊劍南東川節度使制云梓潼與區賢彥回翔者矣舊經稱其俗好勝尚氣不耻貧賤士通經學古罕為異習豈非相沿以使之然歟

文同樂間堂記中江為梓之三萬戶縣生齒既衆分地

既隄其爭鬪之辨侵越之訴番已遽作紛午交衍鞭之
逌而械之獄者亡靈日所決一未歇其願則號寃唱屈
奔走跳盪于勸農使前者絕復續焉士大夫以無可柰
何而適為之令者何嘗不望名而可畏河南廖君自福
昌移治于此聞其所以為政之大抵也無急擊無緩縱
禁以槌之結以觴之摩撫柔願規厲陶突善端奸幾覲
聽而盡民自戒告無敢欺瀆曾未逾歲已底無事云
蜀山谷間民皆冠白言為諸葛孔明孝服所居深遠者
後遂不除出乙卯避暑錄今蜀人謂之帶天孝

蜀中方物記

川西井

蜀都賦家有鹽井之利華陽國志蜀郡廣都縣有鹽井
又有小井十穀所隄為郡牛鞞縣有陽明井鹽又云孝
水識齊水脉穿廣都鹽井諸陂池蜀于是盛有養生之
饒焉郡國志云廣武德二年分魏城置鹽泉縣以城有
鹽井民得採漉為四方賈售之地按廣都今雙流牛鞞
今簡州魏城今屬左綿也寰宇記云益都鹽井最多而
陵井最大在仁壽縣縱橫三十丈深八十丈汲以大牛
皮囊刑從充役甚苦後廣陵井更開狠毒井今之煮井

是也又云仁壽縣五井二井存曰營井在縣南二十五里隋大業元年開水淡遂廢至乾德三年重開日收鹽四十斤曰蒲井在縣南四十里唐武德初開水淡遂廢至宋太平興國三年重開日收鹽三十八斤五兩三井廢曰賴賓井石羊井賴因井

有麗甘井取玉女美麗其鹽味甘為名又有聶甘井古鹽井也其旁有神廟謂之聶社云

又貴平縣一井曰上平在陵州東北九十三里唐朝日收鹽一石七斗五升與百姓分利偽蜀廢乾德三年重脩日收鹽一百七十斤益州記昔平有土井官有兩灶

十八鑊一日一夜收鹽四石如霜雪

寰宇記云井研縣二十一井曰研井在陵州南百三十

二里唐時日收鹽八斗貞觀二十一年崩壞摠章二年

重脩偽蜀淺寨宋乾德三年重開日收鹽四十九斤舊

志陵井在州南一百九里唐時官私日收鹽五斗五升

龍翔元年壞上元二年重開偽蜀淺寨乾德二年重開

日收鹽三十斤一十兩曰稜井在州南百里日收鹽五

十三斤八兩曰律井在州南九十里日收鹽五十五斤

曰田井在州南百五十一里日收鹽三十六斤俱乾德

重開已上五井存曰獠母曰還曰賴倫曰石烈曰范曰

宋曰桶曰柳泉曰賴即曰遮曰新曰董科曰潘今日小羅曰依即曰帶已上十六井廢

寰宇記始建縣七井曰羅泉井舊廢至宋乾德三年重開日收鹽三十五斤今存曰塔泥井石縫井賴胡儒井亦石井賴子井賴澳井已上六井廢

文同丹淵集云井研縣自慶曆以來始因土人鑿地植竹謂之卓筒井以取鹹泉鬻鍊鹽色後來其民盡能此法為者甚衆遂與官中畧出少月課乃倚之為姦恣用鑄琢廣專山澤之利以供侈靡之費豪家至有二三十井其次亦不減七八鄉時朝廷嘗亦知其如此創置無

已深慮寢久事有不便遂下本路轉運司止絕不許開造今水縣界內已僅及百家其所謂卓筒井者以其臨時易為藏掩官司悉不能知其寔多少數目每一家項役工匠四五十人至三二十人皆是他州別縣浮浪無根著之徒抵罪逋逃變易姓名來此傭身賃力平居無事則俯仰低折與主人營作一不如意則遮相扇誘羣黨譁謀算索工直偃蹇求去聚墟落入鎮市欲博姦盜靡所不至已復又投一處習以為常按始逮今入井研縣

沈存中夢溪筆談云陵州鹽井深五百餘尺皆石也上

下甚寬廣獨中間稍狹謂之杖鼓腰舊自井底用栢木為幹上出井口自本幹垂鞭而下方能至水井側設大車較之歲久井幹摧敗屢欲新之而井中陰氣襲人入者輒歿無緣措手惟候天雨則陰氣隨雨而下稍可施工雨晴復止後有人作木盤蓋井上滿中貯水盤底穿小竅釀水一如雨點謂之雨盤今水下日終不絕如此數日井幹為之一新而陵井之利復舊

川南道

華陽國志安南縣有鹽坹滩李冰所平也在漢有鹽井按今嘉州之紅崖是其故處矣寰宇記云榮州有鹽井

五十七所朝野雜記云彭山有瑞應井味稍硝得隆榮鹵餅雜煎之然後成元豐崇寧雨嘗禁止以食者多病故也

杜預益州記云益州有卓王孫井舊嘗于此井取水煮鹽又火井縣西五里有靜邊鹽井皆邛州地華陽國志孝宣帝地節中穿蒲江鹽井二十所增置鹽鈇官寰宇記蒲江縣金釜等八井見歲出課鹽六萬三千斤東坡志林云蜀去海遠取鹽于井陵州井最古濟井富順監亦久矣惟邛州蒲江縣井乃祥符中民王鳶所開利人為至厚焉雅安志州南十五里多白石鹽土人鑛取之

名曰鹽崖

華陽國志江陽縣有富義鹽井以其鹽最多出商旅輻
輳言百姓得其饒富故名按此井深二百五十尺鑿石
以達鹽泉口俗亦稱玉女泉也乾德四年割為富順監
而縣廢管鹽井大小六歲出鹽貨三千餘萬貫勝覽云
鹽井惟富順監最大舊日為額八百餘斤今日額止五
百餘斤楊光清掾堂記三營富順產鹽其地號為貧泉
矣富順志云富義井在縣西一里近年為淡水滲溢灶
十洶遠近舊井賠課而此井遂廢今鹽井十四曰鄧漆
園秦家富小新羅米謝家米周泉狗鳴鶴圓坭羅芹月

岩溪口石欄相者是

長寧縣涪井在縣北寶屏山下輿地勝紀云涪井脉有
二一自對溪報恩寺山趾度溪而入嘗夜有光如虹乱
流而濟直至井所一自寶屏隨山而入謂之雌雄水初
人未知有井夷人羅氏漢人黃姓者因牧而辨其鹹僉
議刻竹為牌浮于溪流約得之者以井歸之漢人得牌
聞于官井遂為漢有後人立廟祀黃羅二神按十州五
園記羈縻十州獻其鹽池官後為涪井監一統志云
長寧治此涪井二派一鹹一淡取以煎鹽塞其一則皆
不流謂之雌雄井矣唐貞觀五年置南通州析置鹽泉

縣以隸之王象之謂叙州近邊之地別無鹽泉意者即今長寧之地注則唐初必輸官矣元歲課辦鹽三十萬斤今歲課辦鹽四十二萬五千五百斤按唐筠州下有鹽水見者是志云筠連縣南二十五里亭臺山像若亭臺狀溪邊有鹽井即木桶井

吉州劉立之通判瀘州有鹽井蜀大姓王蒙正者請歲倍輸以自占蒙正與莊猷明肅太后連姻轉運使等皆不敢予奪君曰倍輸于國家猶秋毫耳奈何使貧民失業遂執不與見歐陽墜傳華陽國志定笮具渡瀘水貧剛徼白摩沙夷有鹽池積薪以齊水灌而後熬之成

鹽漢末夷皆錮之張窳往爭夷帥岑槃本明不肯服窳擒而赦之厚賞餘類乃安今北沙河是也

川東井

華陽國志巴郡臨江縣枳東西百里接胸臆有鹽宜在監塗二溪一郡所仰其豪門亦家有鹽井註水經云江水又東逕臨江縣南王莽之鹽江縣也自縣北入鹽井漢有益井營戶訟注溪井水矣郡志云武隆縣距白馬津東三十餘里江岸有鹹泉初康定間有程運使舟次鵲孝間江中有硫黃氣襲人謂此必有鹹泉駐舟召工開之果得鹹脉是時兩岸新蒸贍足民未知烹煎之法

乃於忠州遷井灶戶十餘家教以煮鹽之法未幾有回百餘灶由是兩岸林木芟薙童狀寰宇記彭水縣東九十里有鹽井一今煎昌元縣南北五十里井九山側亦有鹽井

荊州圖副云入陣圓東南三里有一磳東西百步南北廣四十步磳上有鹽井泉五口寰宇記云夔州永安宮南磳上鹽井以木為桶昔嘗取鹽即時沙壅冬出夏沒又云諸葛鹽井有十四自山下至山上其十三井常空盛夏水漲則鹽泉迤邐遷去于江水之所不及荊州記云朐腮縣北岸有陽溪漢南有鹽井百二十所按陽溪

水源出雲安縣北六百里又水經注朐腮縣翼帶鹽井一百所巴州資以自給粒大者方寸中夾隆起形如張傘故因名之曰傘子鹽有不成者形亦必方異于常鹽王隱晉書地道記曰入湯口四十三里有鹹石大者如升小者如拳煮之水竭而鹽成蓋蜀火井之倫水火相滑乃佳矣水經注建平郡北井縣南有鹽井在縣北故縣名北井建平一郡之所資也

宋開寶六年以夔州大昌縣鹽井鎮置大寧監治距寶山十有七里距大昌六十九里其土多石剛裂不受陶冶官民屋宇多覆茅竹及板以瓦者無幾窳小不謹輒

火飲食旋給不憂凍餒不織不耕恃鹽以易衣食
淳化中將作監丞需說知監事見井場人戶爭及強弱
相凌多抵于訟乃于穴旁剝石為池以瀦水外設橫枝
三十覓承以修竹謂之覓筒蓋鹹泉初出勢暴不可遏
故疏池為壚而三殺之泉流既平均節入覓無復奔衝
不平之患矣至嘉定中歲久弊滋事聞于朝遣榮州資
官令孔嗣宗按置窮訪民瘼有不便者皆除之泉自穴
入覓跨溪為漢而分之南得十三北視南加二各立長
以司其平歲一易寬其法視舊益詳矣民為立祠號
孔長官祠

段氏遊蜀記云通開二州有鹽漆之利宣漢長腰井場
鹹源出大江龍骨窟中灘名羊門兩峭峻鹹源自出遂
煎成鹽寰宇記曰開縣温湯其井有三曰栢木曰龍馬
曰杉木俱成白鹽

川北井

華陽國志巴西郡南充國縣和帝時置有鹽井蜀都賦
註充國縣有鹽井牧十益州記曰南充縣西南六十里
有昆井即古鹽井也南部志縣西五十里寶馬寺有寶
井出鹽日可易一馬人共寶之故名寰宇記云新井縣
武德元年割南部晉安地置界頗有鹽井因斯立名晉

太康地記曰梓潼縣出傘子鹽九州要記云去武縣鹽井近江水淡煎鹽不成飛鳥縣管井七見煎三井餘塞寰宇記云郫縣鹽井四十三眼二十二眼見煎餘廢志云梓川舊有鹽井有僧一新者不知何代人指地教人鑿井鹹泉湧出為利無窮及卒土人置寺奉其遺驅為塔祀之

寰宇志涪城縣管鹽井五十五所十眼煎餘塞又云富國監者本梓州郫縣富國鎮新井煎鹽之場也宋置監以董其事兼領通泉飛鳥等井地去梓州九十里又云通泉縣管鹽井七十四所

蜀記云靈江東鹽亭井古方安縣也周地圖記梁大同九年于此立亭因井名縣管鹽井三煎一有女徒山在縣東二十五里從閬州新井縣界來故老相傳昔有女徒千人于通泉縣康督井配役遇賊于此乃于山頂置柵禦捍遂破賊俗為之置祠今富順鹽井皆嬪人推車汲水由此而論則女徒之山可錄矣寰宇記東關縣管鹽井四見煎三井餘廢永泰縣管鹽井五

井課

杜氏通典云蜀道陵綿等十州鹽井總九十所每年課鹽都當錢八千五十八貫註云陵州鹽井一所課都當



之 為 P21

錢二千六十一貫綿州井四所都當錢二百九十二貫資
州井二十八所都當錢一千八十三貫瀘州井五所都
當錢一千八百五十貫榮州井十三所都當錢四百貫
梓州都當錢七百一十七貫遂州四百一十五貫閬州
一千七百貫普州二百七貫果州二十六貫

圖經云唐萬歲通天二年右補闕郭文簡奏陵井監賣
水一日夜得四十五函半百姓貪利失業長安二年停
賣水依旧稅鹽先天二年加課利歲有三千六百二貫
偽蜀時井塞宋乾德三年平蜀陵州通判賈璉重開旧
井一晝夜汲水七十五函每函煎鹽四十斤日獲三千

斤至雍熙元年春冬日收三千八百一十七斤秋夏日
收三千四百四十七斤蓋水源之有長短也

朝野雜記仙井水產鹽二百餘萬斤隸鹽運司蒲江西
之隸總領所大寧鹽二百五十餘萬斤歲取其四分隸
總領沂涓井鹽四十餘萬斤歲取其贏五萬緡餘為軍
食之用自祖宗以來民間自煮鹽歲輸課利錢八十萬
緡趙應祥變鹽法增至四百餘萬緡又逃絕之井許人
增其額以承認鹽既益多遂不可售紹熙三年楊嗣勛
總計棧閣助筒二千鹽由是頓易自後井戶稍紓而民
間食鹽愈貴矣

太平興國初有司言昌州鹽歲收虛額十一萬八千五百餘斤及開寶中知州李佩率意掊歛以希課最于歲額外則役部民煮鹽民甚以為苦轉運使以聞 詔悉除之

夔府舊志昔大寧鹽井隸監淳熙甲辰部使者楊公輔更法歸之漕司監不復興熙寧中歲額四百餘萬斤紹興中以二百四十萬斤為額閏年加十萬斤為二百五十萬斤

宋熙寧中蜀鹽私販者衆禁不能止欲盡寔私井運解池鹽以足之議未決神宗以問脩起居注沈括對曰私井

井既容其樸買則不得無私易一切寔之而運解池鹽使一出于官售此亦省刑罰籠遺利之一端然忠萬戎瀘間夷界小井尤多止之寔難若列堠如警忍所得不馴所費議遂寢沈括本傳云市易司患蜀鹽不禁欲盡寔私井而輦解池鹽給之言者論二事如織皆不省沈括側侍帝顧曰卿知籍車乎曰知之帝曰何如對曰敢問欲何用帝曰北邊以馬取勝非車不足以當之括曰古人所謂兵車者輕車也 折旋利于速今民間軸車重大日不能三十里世謂之太平車但可施于無事之日爾帝曰人言無及此者遂問蜀鹽事對曰臣恐得不

不足償費帝領之明日二事俱寢

井法

類要云鹽泉有絞漢引泉踏溪每一筧用一漢其筧與漢每年十月旦日以新易陳郡守作樂臨之井民相慶謂之絞漢節

志林云慶歷皇祐以來蜀始開筒井用園及鑿如盃大深者數十丈以巨竹去節牝牡相銜為井以隔橫入淡水則鹹泉自上又以竹之差小者出入井中為桶無底而竅其上懸熟皮數寸出入水中氣自呼吸而啓閉之一筒可致水數斗凡筒井皆用機械利之所在人無不

知後漢書有水鞮此法惟蜀中鐵治用之大畧似鹽井取水筒太子賢不識妄以意解非也

近時射洪士人馬驥謨鹽井圖記云鹽井其來舊矣先世嘗為皮袋并圍徑三五尺許底有大利饒課重工力浩鉅非一載弗克竣今皆湮沒殆盡不可考民循故業以納課率多從竹井制其為次第在井匠董之凡

匠民相井地多于兩河夾岸山形險急得沙勢處鳩工立石圈畫去面上浮土不計丈尺以見堅石為度而鑿大小竅焉大竅大鐵釘主之小竅小鐵釘主之釘一也大釘則有釘頭扁竟七寸有輪鋒利穿鑿興井日北口

旁樹兩木橫一木于上有小木滾子以火掌繩鉗末附于橫木滾子上離井六七步為一木椿斜火掌箴而耦春之滾竹運鉗自上下相乘矣匠氏掌鉗箴坐井口旁周遭圍轉令其覈圓直初則灌水鑿之及二三丈許泉蒙四出不用落水無論上石鉗觸處俱為泥水每鑿一二尺匠氏命起鉗用筒竹一根約丈餘通節以繩繫其稍筒末為皮錢掩其底其泥水所在匠氏捺繩伸縮皮歛水入挹滿攪出泥水漸盡復下鉗鑿焉次第疏鑿不計功程力大較至二三十丈許見紅石若口大覈告成矣隨議下竹、有木竹樺竹二種木竹取堅也剡木二片

以麻合其縫以油灰罅其隙樺竹出馬湖山中亦以麻裹之木作末為大麻頭纍、節合下盡全竹四漬淡水障阻不能漫淫迺截去大鉗頭用鉗梢鑿小覈法如大覈然鑿至二十丈中見白沙數丈有鹹水數担名曰腰脈水去鹹水不遠尋鑿之而鹹水涸涓自見也水有廣水晝夜力以不竭然味近淡有鹹水晝夜計有數狀味亦不齊有一担而煮鹽五六斤者有八九斤至十二三斤者碩遇何如耳厥工既就始樹樓架高可以敵樓上為天滾有輓轆殼制筒索吸水如前吸泥水法而樞軸則管于車床也床橫木為槩、有兩耳作曲池狀左右

低昂逆施在揖地右伸在揖地左伸循環用力索盡筒
出鹹水就灰筥潑水而煎燒有緒矣轉轆轤者蓋三人
為之力厚者則制牛車之狀大力逸而功倍也此自成
井而論耳若掘鑿之際鈇偶中折而墜其中者或遭淤
泥作阻者其出法亦巧而為器亦異鈇帶火掌篋而墮
者以攪 鈞出為力易 惟鈇半墮或止墮鈇頭者取
之 法制為鉄五爪如疾手狀爪背入木數寸以竹三
尺許劈碎一尺纏扼爪木令堅緻上一尺亦劈碎則活
繫種子鈇不令拘泥偏向中一尺通其節以待種子鈇
假道捷伐垂入井爪定所墮鈇頭匠氏從上督索槿

子鈇由筒中擊木之擊五爪數擊則爪攬勒鈇頭者牢
不可以游滑自匿雖欲不出不可得矣若被淤泥填溢
大小覈猶闕格症然甚者製為搜子以和解其膠密搜
子者鉄條之有嚙齒者也未甚者製為漕鈇以衝擊其
脂疑漕鈇者種子鈇之有嚙齒者也支觚既析則為制
筒以取其泥刮筒之制與鹽筒殊科不通其節而每節
之始鑿為方口投井口汲泥亦如汲水式蓋水可以疏
通翁受泥則踰節不可是匠氏作法意也嗟乎一井之
成其次第節目如此亦云勞矣乃勞婦灶丁利婦商販
富灶任逸傭灶任力終歲窮日疲弱者何而征輪又告

急矣至有坍塌而乾賠國課者有逋負而逃徙流離者是在上之人寬一分則民受一分之賜云

蜀都賦云密戶都毓被其阜山圖采而得道華陽國志宕渠縣有石密宿山圖所采也本州石密出益州及西戎煉砂糖為之成餅塊有黃白色寰宇記茂集達三州產密資州產甘蔗容齋隨筆云糖霜之名唐以前無所見自古食蔗者始為蔗漿宋玉招魂所謂脯鱉魚羔有柘漿是也其後為蔗錫孫亮使黃門就中藏史取交州所獻甘蔗錫是也後又為石密南中八郡志曰窄甘蔗汁曝成飴謂之石密本草亦云煉糖和乳為石密是也

後又為蔗酒唐赤土國用甘蔗作酒雜以紫瓜根是也唐太宗遣使至摩揭陀國取熬糖法即訪揚州上諸產榨潘如其劑色味愈于西域遠甚然只是今之砂糖蔗之枝盡于此不言作霜然則糖霜非石也歷世詩人模模竒寫異亦無一章一句言之惟東坡過金山寺作詩送遂寧僧圓寶云涪江與中冷共此一味水冰盤薦瑞珀何以糖霜美黃魯直在我州作頌荅梓州雍熙長老寄糖霜云遠寄蔗霜知有味勝于崔子水晶鹽正宗掃地從難說我舌猶能及鼻尖則遂寧糖霜見于文字者寔始二公甘蔗所在皆植獨福善四明番禺廣漢遂寧

有糖水而遂寧為冠四郡所產甚微而顆碎色淺味薄
絕比遂之窳下者亦皆起于近世唐大曆中有鄒和尚者
始來小溪之緞山教民黃氏以造霜之法緞山在縣北
二十里山前後有蔗田者十之四糖霜戶十之三蔗有
四邑曰杜蔗曰西蔗曰芳蔗本草荻蔗也曰紅蔗本艸
崑崙蔗也紅蔗止堪生嚼芳蔗可作沙糖西蔗亦可作
霜色淺土人不甚貴杜蔗紫嫩味極厚專用作霜凡蔗
最困地力今年為蔗田者明年改種五穀以息之霜戶
器用曰蔗削曰蔗鏟曰蔗斃曰蔗碾曰榨斗曰榨牀曰
漆瓮各有制度凡霜一瓮中品色亦自不同堆疊如假
山者為上國枝次之瓮鑑次之小顆塊次之沙脚為下
紫為上深琥珀次之淺黃又次之淺白為下宣和初王
黼創應奉司遂寧常貢外歲別進數千斤是時所產益
奇墻壁或方寸應奉司罷乃不再見當時因之大擾敗
本業者居半久而未復遂寧王灼作糖霜譜七篇且載
其說予採取之以廣聞見

卷終

郡國利病書卷六十七

蜀中邊防記

川西

松潘 漳獵

小河

松潘道開府潘松衛與副總兵官一員分城而居叅將一員舊駐小河千戶所今移駐龍安城遊擊將軍一員駐劄漳臘堡守備都指揮一員駐劄平番堡其餘把守練兵官各有差

按後漢書建武九年司徒掾班彪上言舊制涼州部置護羌校尉持節領護理其怨結歲時巡行問所疾苦又數遣驛徒通道動靜使塞外羌夷為吏耳目州郡因此

可得倣備今松潘備兵即古護羌使者之職也

尋江源縣記云松州平戶縣羊膊山下有二神湫乃大江始發之所自羊膊嶺散漫始未濫觴東南百餘里至白馬嶺回行二千餘里至龍洞水漳始于是也志曰江發源于臨洮之木塔山至山頂分東西流者即岷江也由草地甘松嶺八百里至漳臘其水漸大漳臘由鑊刀灣達松潘于下水關入紅花屯達壘溪至穆肅堡黑水從南合之入深溝經茂州南至于威汶轉銀嶺合卓坡河至蠶岩入灌口分道而下由威至玉壘山為玉輪江至汶為阜江至淮為沫江

志又曰衛北三舍有龍潭四序淵澄其深莫測有嶺謂之小分水嶺又有大分水嶺山高峻而水派流在衛北二百里外

四夷傳曰西羌之本出自三苗其先為伯夷甫炎帝之裔帝母育子姜水而以姜為姓故羌亦姓姜其國始近南岳及舜徙之三危今河關之西南羌地是也濱于賜支至于河首繇地千里賜支者析支也正王政脩則臣伏德教失則寇亂本無君長夏未及商周之際或從侯伯征伐有功天子爵之以為藩服羌援爰劍者秦厲公時為秦所執以為奴隸羌人謂奴為無戈故號為無

戎爰劍後得亡歸將其種人南出賜支河其後子孫各自為種或為釐牛種越舊羌是也或為白馬種廣漢羌是也或為參狼種武都羌是也至爰劍曾孫忍及弟舞獨留湟中忍生子研故羌中號其後為研種漢景帝時研種由河求守隴西塞于是徙由河等于狄道安故及武帝西逐諸羌乃渡河湟築令居塞始至護羌校尉從爰劍種五世之研，最豪健以研為種號浪良者燒當之玄當復豪健其子孫更以燒當為種號浪良者燒當之玄孫時王莽末四夷內侵及莽叛眾羌還據西海光武之世以牛邯為護羌校尉即此地也及燒當至滇良世居

河北大允谷種小人貧而先零卑湍並皆強富數侵犯之滇良父子種積怒從大榆中入掩擊先零卑湍大破之掠取財畜奪居其地大渝中由是始強滇良父子滇吾立附落轉盛嘗雄諸羌在井內附以其地屬汶山郡宋齊亦得之後為西魏所有焉魏書鄧至傳王像舒治者並白水羌也常為羌豪自稱鄧至王其子舒彭遣使內附拜龍驤將軍益州刺史甘松縣開國子鄧至王請以封爵授子彭奮高祖許之拜奮健忠將軍甘松縣開國子即為小藩朝貢相繼關中亂乃絕後魏末平鄧至耆始繞有其地後周保定五年于此置龍涸防天和

元年改置扶州領龍涸郡隋初廢州郡以其地併入汶山同昌二郡唐武德元年置松州貞觀二年置都督府松踞懿嵯潤隣雅聚可遠奉嚴諾我彭軌盍直肆位王璋祐臺橋序等二十五羈縻州永徽之後生羌相繼叛服不常儀鳳二年復加整比督文扶當柘靜翼六州都督羈縻研州劍州探邠州杞州河州幹州瓊州犀州拱州毗州龕州涪州如州麻州霸州礪州光州至涼州蠶州擘州黎州邏州思帝州眺州成州統州穀州邛樂容州達達州卑州慈州凡三十一州據天寶之載薄松州都督府督一百四州其二十五州有額戶口頗多但羈

縻逃散餘七十九州皆生羌部落或臣或否無州縣戶口矣天寶初改松州為交州郡乾元初復為松州按貞觀之時分十道松文扶當悉柘靜等州屬隴右道永徽之後割屬劍南道也

寰宇記云松州治嘉城縣按嘉城縣即後魏白水羌像舒治所據也其子舒彭遣使朝貢拜龍驤將軍始置甘松縣矣後周之龍涸防及改置扶州皆治于此隋曰嘉誠唐曰嘉城則為松州之所治也

志云甘松嶺在衛西北三百里州以此名按山海經云甘松嶺亦謂之松葉嶺即江水發源于此土人謂之松

子嶺也又有石門水白龍州石門山連亘經郡界合江故曰石門水矣

寰宇記曰松州屬縣有平康交州接平康縣晉屬汶川郡隋屬會州後廢唐垂拱元年割交川及當道通軌翼斜三縣置平康縣屬當州 交川縣後周天和中置隋屬會州唐改屬當州志云平康交川二廢縣俱在衛治西

通志曰潘州者唐廣德初年松州陷于吐蕃五代諸羌各據其地宋崇寧取邦潘疊三州初屬吐蕃首領潘羅支此潘州之名所由起也元屬吐蕃宣慰司國初洪武

十一年御史大夫平羌將軍丁玉克復其地謂松州潘州二衛後併為松潘衛鎮守茲土者二十年後復改松潘等處軍民指揮使司隸四川都司屬川西道領守禦千戶所曰小河安撫司四曰八郎曰麻兒匝曰阿角曰芒兒志云八郎山在衛北三十里山下為八郎安撫司也長官司十七曰占藏先結曰蠟匝曰白馬路曰山洞曰阿昔曰白定曰麥匝曰者多曰牟力結曰班二曰祈命曰勒都曰包藏曰上阿昔曰思曩兒曰阿用曰潘幹寨各降符命列為守土焉復立番僧二人為國師曰商巴曰綽領二人為禪師曰黎巴曰完卜亦皆佩銀蠻也

西邊記云國師商巴佛教也禪師黎巴道教也其寺觀散居寨落以主化導番夷丁大夫時設鑄金銀錠有足或無足者賞及諸番呼曰丁大夫寶重五六兩者番價值三五十兩其定有一二錠遂名為財主錠發夜光稱神異矣

龍涸志云男曰安達女曰白麻多種青棵圓根好用毡羊麥粉宋史云松蕃之俗日耕野壑夜宿碉房刻木契以成交易炙羊膀以斷吉凶人精悍善戰聞也

志曰其地廣六百七十里袤千六十里編戶通二十里東至龍州界一百九十里西至牟力結吐蕃草地界

四百八十里南至疊溪守禦千戶所界二百里北至陝西洮州衛界八百六十里距成都七百六十里雪嶺面于東洮河界其西雪嶺其色如銀俗呼為寶頂山蠶崖路險人跡罕到即老杜所稱松州雪嶺東也洮河發源岷山北流入陝為臨洮府南入川與江漢會矣

三邊志曰金蓬山在東南五里羌金蓬者居之山下石崖鑿永泉二字正統初都督李安以劍破崖而得二水亦名文武水 紅花牛心二山各去衛十五里峯巒圓秀者牛心也紅花有屯田是名紅花屯矣又東四十里為火嶺山、無草木其色如赭

四夷考云宣德二年松潘千戶錢宏聞有交趾之役憚于遠征乃誘蛮族入寇譚張奏報得留不遣蛮自是煽禍攻圍城堡調官軍五十討之至威州黃土鋪矣利道遂不通三年命總兵都督陳懷等帥西軍四萬由洮州入松潘解圍猶弗克靖八年復調川貴官軍協力從事始克成功正統四年都指揮趙諒誘執蛮酋國師商巴以犯邊間遣都督李安征之尋誅諒誣妄蛮乃服然猶二三十年始設松潘巡撫都御史一員以都御史寇深及侍郎羅綺相繼臨之咸有成績綺還京提督文臣不復更置但以脩兵使者整飭之而已天順五年蛮截

我糧道入龍安石泉等處成化十三年勢益猖獗復勅撫臣張瓚調漢土官兵五萬由東南二路分進勦滅白羊嶺鷲飲溪等二十一寨斬蠻首級四百餘顆于是商巴等二十六族詣軍門獻馬納款各諭以利害遣之十四年正月復攻黃頭復水諸寨前後殺獲男婦七百餘人赭其碉房九百墜崖死者不可勝計亦一大創矣宏治間跳梁如故南路梗阻正德二年副總兵楊宏誘殺綽嶺寺國師雪郎王出自後本寺小宛卜等動稱報仇松城之外不敢盡牧嘉靖十一年勅副總兵何卿來節制諸軍相機勦討烏都等十一寨皆次第平而詣軍門送款

者日至矣。鄉家視松州諸所繕緝百廢具興。藩籬以固。兵威亦震。百蠻喘息不敢動。垂五十年。來生齒日繁。復萌戎心。時出殺人剽掠。行旅萬曆八年。備兵使者楊一桂。是以有三寨之役。又雪山國師喇嘛等四十八寨。勾虜為患。邊岷岷。十四年。都御史徐元泰。是以有會剿之役。及丙申九月。秋高虜突。由寒盱黃勝草場分道馳入。圍漳臘。守備張良賢率兵破之。斬首六級。又攻鎮虜。百世杜世仁。以戰斬首四級。城得保全。世仁歿。焉又攻制虜臺。前後斬首十一級。虜遁去。良賢追至思答弄。又大破之。斬首十六級。虜乃失利去。初虜之入也。罷我無

備偵者。不知其數。及遁去。巡視營壘不止五千餘。灶未幾有番嬪。逃回言所斬虜級中有大落赤之姪小王子。在焉。虜以此必欲報仇。故昔之松潘。重在番。今之松潘。重在虜矣。

四夷考曰。松潘西至流沙。閩相近。天竺西南。達紅土坡。生番多係北虜。出沒地勢遼絕。非可限域。惟是南道通疊茂。威灌東通小河。龍安北通漳臘。墩臺守禦。凡八十。七所。戍守主客官軍舍餘遊兵一萬一千六百八十餘人。歲額坐邊倉一十六處。糧九萬九千三百八十餘石。而增設之處。不與焉。

東路經畧志云松潘以東望山關雪欄關風洞關松林堡紅崖關三舍堡鎮遠堡小關子堡松了堡三路堡師家堡四望堡九十二處抵小河千戶所四崖絕壁一線之逼附近水牛毛公年洞番諸未甚鴛獫今以三舍關為始第其里次。三舍者去衛城九十里而遙也為小河適中地有把守指揮一員管轄上至望山下至回望共十三關堡羊腸鳥徑峭壁危湍嶮巖萬狀番夷往來潛伏而窺伺焉三舍上十里為伏羌堡伏羌上十里為紅崖關紅崖上十五里為松林堡志云黑松林關在治東七十里松林上九里為風洞關志云風洞關在治東

五十里洞深不可測多惡風乍輒大作則灰沙蔽天人馬皆辟易寒氣襲人觸之多橫死否則喘息旬日蓋山嵐鬱蒸之氣所發也關北鹽井墩即古鹽川廢縣風洞上五里為雪欄關志云治東三十里雪欄山四時積雪不消俗呼為寶頂山關在山下雪欄上十二里為望山關之上八里即松州也三舍下十里為鎮遠堡鎮遠下八里為小關堡志云小關子在治東百二十里小關下八里為松埋堡松埋七里為三路堡三路下八里為師家堡師家下八里為四望堡又二里為小河所矣南路經畧志云松潘以南紅花屯熊橫屯西寧關小屯

堡安化關鎮華堡新塘關艾蒿堡歸化關北定關蒲紅
關平夷堡金瓶堡鎮平堡鎮番堡靖夷堡平定堡凡十
有七處抵疊溪界

四夷考曰南路自西寧關起以至平定堡河東大姓屬
牛毛土官管轄河西小姓屬羊毛土官管轄即志所
謂牛腦羊腦也不服冠帶不受約束喜則同部落席地
歡飲怒則持刃彼此相擊尊卑之序蕩然矣萬曆初年
河東頗肆兇陵十四年征之搗其巢穴斬首二千餘級
焚碉房千餘座始傾心向化埋兒誓願認守地方迄今
不敢犯河西時有長江之阻逆我文告其時亦震聾移

遁深箐隔岸羅拜乞降許之有國師喇嘛灣仲者潛獻
皮幣于土噫乞師伏于鉄炉溝以牽制我乘便邀擊事
覺就擒其謀始破而膽

歸化關志云在司南百里寰宇記霸州有歸化縣置在
移村各有部落主持無徵科今雖設故處而關名寔因
之地形險要上至西寧下至鎮江關堡凡九把守指揮
一員以龍溪等寨大小橫梁為諸番所出沒也歸化上
七里為龍韜堡龍韜堡上十里為新鎮關新鎮上十里
百勝堡百勝上五里為安化關安化上七里為雲屯堡
雲屯堡上八里為西寧關志云在治南三十里西寧上

八里為雄溪屯則南路之首也鉄爐海諸夷在其界矣
歸化下十二里為北定関志云北定関有祠祀二邊史
劉方五將正德六年番僧雲欄王出謀為不執守將指
揮邊輔史寬百戶劉賢方捷櫻鋒歿戰輔寬遇害于黃
土坡賢捷被執至寨縛住將剖其心二將罵不絶口而
亡事聞與子孫進一級承龍輔弟輪承兄職嘉靖七年
巡南路至此定関遇橫梁茹兒等番率其僕邊永興
軍餘史卜匝等數人與戰已取勝值天溪泛雨諸番回
集輪被傷永興負輪行數十步至崖不能進執刀乱揮
知不可支乃伏於輪身主僕俱被害事聞贈輪都指揮

僉事永興百戶史卜匝等俱厚賚優恤焉北定下十有
百里為鎮江関別拓大小耳別等寨在其寨内寰宇記
云歸化縣有大聾山小聾山在霸州西北一十里號符
堅城又云于小聾山上村置牙利縣 即大小耳之故
迹也鎮江下四里為平番堡平番下八里為平夷堡其
地寬平僅容千騎為四十八寨飲盟歃血之地即黃沙
壩矣萬曆十四年建城堡設守備一員把總練兵官一
員管轄自西寧関至平定堡為鎮平関上七里為金瓶
堡金瓶上六里為平夷堡鎮平下七里鎮番堡鎮番下
八里為靖夷堡靖夷下八里即平定堡也平定下八里

為永鎮堡係松茂二鎮交界處鎮平堡則指揮一員守之

北路經略志云松潘以北穀東屯高屯子羊裕屯唐舍屯譚廓屯漳臘屯以上凡七堡抵吐蕃洮河界

四夷考云漳臘堡設在河東去城三十八里松州之背也舊制駐劄守備一員管轄上下關堡為寒盼口上中潘州上下羊洞隘口自漳臘北左遼廓幽遠一望無際蓋萬騎可從容矣近改設游擊一員以鎮壓之良審所重也漳臘上十五里為鎮虜堡在河東元山子上志云堡在漳臘東北十里堡後天險墩堡前觀化墩河東子

襄臺河西制虜臺敵勢相望然直北為敵貢堪奮掘品字賺抗數百中置鋒刃木簽口覆芭土以掩其形又北去三里曰城墻岩東臨河畔西抵山麓掘壕寬深丈許橫截六百餘丈明繼彼路河西川盼溝壕塹之制亦如之越溝二十里登阿玉嶺之巔可矚黃勝草場志云黃勝在漳臘西南十里也場之東有阿玉口凡二十里透嶺出川盼則可南可北惟所馳驅議者于天險觀化二墩充拓寬廣石砌墻垣一周外掘壕塹以防衝突而庶幾掘其吭云鎮虜堡上二十里之栢木橋即界外矣漳臘下七里為虹橋關係松城北隘志云松州北二十里有

落虹橋長二十丈餉道所必經也虹橋下七里為譚廓
屯譚廓下七里為糖舍屯塘舍下六里為羊裕屯羊裕
下六里為即松城又虹橋下八里為高屯子高屯下七
里為穀粟屯穀粟下十里亦即松城也離松十四里為
流沙關乃北虜紅由地每秋防必加意焉松城下五里
為紅花屯紅花下七里為雄溪屯雄溪左十三里為東
勝堡歲熟番受賞可稱無事惟是虹橋西北十五里為
絕寨墩北界黃山尖殺鹿塘黃勝草場等處路通洮
岷先年陳懷率兵由此道入解松圍今為番虜間阻以
其往來射獵于斯也下潘州白利等番挾牛羊毡毳來

或由阿玉嶺或由鐵門墩出抵寒昞祈命諸寨貿易茶
斤歲以為常稍失防範釁端輒起且阻絕長海救援難
及形勢孤懸所最當籌度議者于墩前石砌聯城一座
直抵河下以通水道又依山掘壕絕其乘高則于衆壑
手何有

古蹟志云潘州故城在衛北七百五十里漢武帝時逐
諸羌渡河湟居塞外築此城置護羌校尉以禦之宋時
分上下中潘三州今阿失塞即上潘州班之簇即下潘
州界二州之間則中潘州也其地愈北山愈平夷舊漳
臘之設在下潘州

侍郎羅綺漳獵新記云距松衛治之北百里曰漳獵即古潘州也城之故趾尚在其下有岩穴空洞幽邃廣可容列騎深亦不知幾許旁有玻璃泉冬夏淵狀不涸其土地膏腴山川秀麗蓋自唐盛時所開拓雖隸版圖而土番酋長猶然竊據所謂但羈縻之而已宋元以來無復中國有我朝混一華夏極天極地莫不臣服洪武十一年王師始下潘州入與編民賦役無殊乃于其地建置屯堡使士卒且耕且守累數十年足食足兵邊人安堵宣德丁未守將失馭氏羌蜂起梗我餉道燹豕閔寨而潘州復為所據者凡二十有八年景泰辛未奉命

來鎮茲土不揣愚欲平復之乃大集諸酋陳以逆順禍福無不稽顙聽命于是復增置城池樓櫓凡戰守之具視昔有加焉不殫一石之粟不勞一人之力而數千百頃沃饒之地遂復為我有又晏然置城于其間俾兵農雜居累歲豐獲邊人安枕寔朝廷威德所及余何功之與焉或者以潘州之城與唐世籌邊樓相頡頏後先予亦豈敢多讓景泰六年記

曹學銓曰今之漳臘去松州一舍而遙非百里外之漳臘矣前張後弛勢使然也余以庚戌署潘司事料松邊兵食聞韃虜住牧于漳臘城內有百五六十帳殊賊聽

聞乃檄漳臘游擊何奮武得回牒云謹按漳臘一鎮五隘九屯一十八墩堡延袤二百餘里襟帶山河襟屈夷虜所由來矣前不具論萬曆二十四年大落赤入寇彼時內有守備張良賢救應以截其鋒外有合坭犄角以牽其勢雖虜衆攻圍鎮虜三晝夜而不能破于時掌堡百戶杜世仁也豈異人任而其父子督軍兵數百人乃能射死小王子斬首數十級松漳卒賴無事以而合坭遂因之任牧焉續在三十二年廢將李宗望代庖漳臘又有合免頓奪咱毛免損等韃接踵投居會治兵使者亦署官也侈然有張伐之意輒撫賞安軟牛馬羊隻布

滿山溪毛帳毡房星列艸地猶時腋間眠虎豹門庭內牧犬羊逐之恐釁端自此發也聽之恐禍本無所終也彼其往來漳松之間豈非共我水草利我鹽茶凡倉庫之虛寔軍兵之強弱道路之衝要無不盡知萬一生心何以制而禦之惟是高屯堡者在虹橋之內禦寇之下譚廓之西正適中之要地寔乃松鎮以北之藩屏也議者設把總一員撥唐順等軍五十名以耀威武而坐搯其吭焉誠為長策矣第當展築屯基寬包隙坭貫路于中不惟容衆且可據險緣由到司農看得松潘者蜀西之門戶漳臘者松潘之咽喉也自土韃合坭舍免頓等

住牧于中毡房毳室以百五六十計犬羊之性馴擾無常非我族類其心必異豈非他日之隱憂者隋唐之禍可鑒也但即既來之則安之可以理而諭也方來者所當拒可以勢而禁也惟是漳臘之鎮虜堡原設把守一員地方遼濶勢本孤懸今且伏戎在內萬一有變敵息不相聞何暇左右顧議者以高屯堡要害之處添設把守以遏其衝其衝且與漳臘為犄角誠策之善者也該堡事務仍令本官兼攝巡視軍兵即在各營抽選亦無所糜費矣若夫釐行伍除戎器綢繆未雨有備無患此該道將之事也時當事者如議行之

小河千戶所國初洪武十一年與松潘衛同置在衛東百九十里宣德四年調成都前衛後所官軍寔治之仍隸松潘按小河之地古名涪陽以水出於松潘分水嶺入涪江也在涪水之陽矣

志云所北二十里師家山一名文山宋時師文二大姓居之山麓有文山閣又有師家鋪則界于龍州也東有獅峯西有象嶺各離一里許有靈泉焉出獅峯下經畧志云松潘又東為堡七曰蜂崖葉棠馬營水進鎮夷乾坤鐵龍乃抵龍安

四夷考曰小河之下鐵龍之上惟葉棠為要隘有葉棠

把守官轄之東通白馬毛公西逼竹頭野猪白艸諸寨
上六里為峯崖堡峯崖堡上十里即小河也下四里為
馬營堡馬營下七里為水進堡水進下八里為鎮夷堡
鎮夷下十里為乾坤堡乾坤下二十里為鉄龍堡有兩
山對峙峭壁萬仞二水會流深不可測上為鉄索橋索
凡六條各長一十五丈引于河之西岸繫于鉄柱中道
板蕩行者戒心為嘉靖間龍州宣撫薛兆乾作乱斬鉄
橋以拒官兵旬日松州采貴如金矣鉄龍下十五里即
龍安府云

唐史太宗置松州都督府督羈縻二十五州為踞州貞

觀元年置領縣二江源沅稽 懿州五年置西吉州八
年改為懿州領縣二濶涼落吳 麟州五年置西麟州
八年去西字領縣七硤州和善斂具硤源王交利恭東
陵 雅州五年置西雅州八年去西字領縣三新城三
泉石隴 蒙州三年置領縣五都流寧遠臨泉臨河其
餘厥調奏殷匄器迹率鍾並諸羌部落遙立之而已
可州四年置西義州八年改為可州領縣三義成清化
靜方 遠州四年置領縣二羅水小部川 泰州三年
置西仁州八年改為奉州領縣三奉德思安永慈 岩
州五年置西金州八年改為岩州領縣三金池日松丹

岩 諾州五年置領縣三諾川 歸德 離渭 蛾州五年
置領縣二常平 鄆川 彭州三年置 洪州七年改為彭
州領縣四洪川 歸遠 臨津 歸正 軌州都督府二年置
領縣四通川 王城 金源 俄微 盩州四年置 西唐州八
年改為盩州領縣四湘水 河唐 曲嶺 祐川 直州五年
置 西集州八年改為直州領縣二集川 新川 肆州五
年置領縣四歸唐 芳藜 鑿水 磨山 伍州四年置 西鑿
州八年改為位州領縣二位 豐西使 玉州五年置領
縣二玉山 帶河 漳州四年置領縣四 洛平 顯川 桂川
顯平 祐州四年置領縣二 廓川 歸定 臺州六年置

西滄州八年改為臺州 檣州六年置 序州十年置
嗟州濶州十年置 右俱貞觀之時招慰党項羌者舊屬
隴右道改隸松州都督府永徽以後或叛或臣制置不
一今並廢有聊備古跡而已

唐書吐谷渾西羌名正益州西北去青海二十五里古
析支之地漢西羌之別種也魏晉已降西羌微弱周滅
宕昌鄧至之後党項始強南雜春桑迷桑等羌北連吐
谷渾其種每姓別自為部落一姓之中復分為一小部
落大者萬餘其小者數千騎不相統一有細封氏費聽
氏往利氏頗超氏野辭氏房當氏來禽氏拓拔氏最為

強族貞觀五年詔遣使開其河曲地為六十州內附者三十萬口有羌首拓拔赤詞者甚為渾主伏允所暱與之結婚屢抗官軍後與其從子思頭並率服與諸首領歸款列其地為懿嵯麟可等三十二州以松州為都督府羈縻存撫之拜赤詞為西戎州都督賜姓李氏自是從河首積石以來並為中國之境後吐蕃強盛拓拔氏漸為所逼遂請內徙聽移部落于慶州因置靜邊等州以處之故地陷于吐蕃不去者為其役吐蕃謂之弭藥又有黑項党在赤水之西李靖之擊吐谷渾也渾主伏允奔于黑党項居以空閑之地及吐谷渾舉國內屬其

黑党項首領號孰善王亦貢方物其雪山党項姓破丑氏居雪山之下貞觀初亦嘗朝貢又有白狗春桑白蘭等諸羌自龍朔以後並為吐蕃所破而服屬焉

有附國者在蜀郡西北二千餘里即漢之西南夷也嘉良夷即其東部所居種姓自相率領不屬統一隋大業五年附國王遣其弟子宜林率嘉良夷等六十八人朝貢嘉良有水濶六七十丈附國水濶一百丈並南流以皮為船而濟南有薄線夷風俗亦同西有東女國東北連山綿亘數千里接党項及諸羌界其地南北八里百東西千五百里無城柵近山谷傍山險俗好復仇故壘石

為巢而居以避患其巢高至十餘丈下至五六丈每級
水隔之基方三四步磔上方二三步狀似浮園于下級開
開小門從內上通夜必關閉有二萬餘家俗有重罪止
于罰牛妻其郡母及嫂兄弟及父兄亦納其妻好歌舞
鼓簧吹笛死者無服制置尸于高牀上沐浴衣服披以
牟申裘以獸皮子孫不哭帶甲舞劍而呼云我父為鬼
所取我欲報寃殺鬼其人輕捷便擊劍漆皮為牟甲為
弓長六尺以竹為弦以皮為帽形圓如鉢或戴罽羅衣
多毛褐全剥牛脚皮為靴項繫鉄錢手貫鉄釧王與酋
帥金為首飾胸前懸一金花徑三寸其土高氣候涼多

風少雨土宜小麦青稞山出金銀多白雉水有嘉魚長
四尺而鱗細

東女國者西羌之別種也以西海中復有女國故曰東
以別之俗以女為王東與茂州党項接東南與雅州接
界隔羅女蠻及白狼夷有八十餘城王之所居名康延
川中有弱水南流亦用牛皮為船以渡戶四萬餘衆女
王號為賓就有女官曰高琪平議國事在外官僚並男
夫為之其王侍女數百人五日一聽政女王死國中多
飲金錢動至數萬更于王族求令女二人立之大者為
王次為小王若大王死則小王嗣立或姑死而嬪繼並

無篡奪所居皆重起屋王主九重國人至六重王服青色綾裙一領衫其袖委地重嬪人輕丈夫文字同于天竺以十一月為正每至正月令巫者賚酒醴詣山中散糟麥于空大咒呼鳥俄時有鳥如雞飛入巫者懷中因剖其腹視之有一穀來歲必登若有霜雪必多灾異其俗因之名為鳥卜隋大業中蜀王秀遣使招之拒而不受唐武德中女王湯傍氏始遣使貢方物自永德七年至于天寶元載朝貢不絕其後復以男子為王貞元九年其王湯立志與哥隣國王董卧庭白狗國王羅陀忽逋祖國王弟鄧吉知南水國王姪薛尚志曩弱水國王

董辟和悉董國王湯悉贊清遠國王蘓唐磨咄霸國王董邈蓬各詣劍南西川乞內附其哥隣等國皆散居西川弱水國即唐初女國之弱水部落其悉董國在弱水西故亦謂之弱水西悉董王舊皆分隸邊郡祖父例授將軍中郎果毅等官自中原多故皆為土蕃所役屬其部落大者不果二三千戶各置縣令十數人理之土有絲絮歲輸于吐蕃至是悉與之同盟相率獻款魚賚天寶中國家所賜官誥二十九道以進節度使韋臯處其衆于維霸保等州給以糧種耕牛咸樂生業立志等數國王自來朝貢見于麟德殿授立志銀青光祿大夫歸

化州刺史鄧吉知試太府少卿兼丹州刺史薛尚恚曩
 試少府少監兼霸州長史董卧庭行至綿州卒贈武德
 州刺史命其子利羅為保寧都督府長史襲歌隣王立
 恚妹乞恚湯頗有才智從其兄來朝封和義郡夫人其
 大首領董外卿等皆授以官俄又授國王兄湯厥銀青
 光祿大夫試太府卿青遠王弟蘇歷顛銀青光祿大夫
 試衛尉卿南國王薛莫庭及湯恚贊董邈蓬女國唱後
 使湯佛迦美王鉢南郎唐并授銀青光祿大夫試大僕
 卿其時西山松州生羌等二萬餘口相繼內附其黏信
 部落主夢葱龍諾部落生辟葱皆授試衛尉卿立恚等

并赴明年元會訖賜以金帛各遣還至八月召韋臯統
 押羌蠻及西山八國使其部落至今猶代襲刺史等官
 狀亦潛通吐蕃故謂之兩面羌也

威州 保縣 茂州 疊溪 汶川 淮縣

威茂道開府茂州轄威保疊茂諸將領而叅將一員駐
 劄茂州游擊將軍一員駐劄疊溪寔左右之

威州通志云禹貢西戎即叙今松茂威保以接于吐蕃
 是也亦謂之西番先本羌屬百餘種散處河湟江岷間
 其酋族羌唐禿等居析支水西南羌禿髮利鹿孤之後
 也利鹿孤有子曰興居初利鹿孤卒時樊尼尚幼弟傳

檀嗣伍以樊尼為安西將軍後魏神瑞元年傳檀為西
秦乞佛熾盤所滅樊尼招集餘衆投沮渠蒙遜以為臨
松太守及蒙遜滅樊尼乃率衆西奔濟黃河逾積石居
跋布川或邏婆川于羌中建國開地千里樊尼威惠夙
著為群羌所懷皆撫以恩信婦之如市遂改姓為宰勃
野以秃髮為國號語說為之吐蕃其國都城號為邏些
城隋開皇中有論贊索者居牂河西唐貞觀中始通中
國既而滅吐谷渾盡有其地焉接吐谷渾鮮卑種也沈
約宋書曰誰縱亂蜀之歲鮮卑阿豺遣其子西疆攻
吐谷渾殺來泥拓土至龍涸平康元嘉二十七年鮮卑

慮索虜復生遣使上表云若不自固者欲率部曲入龍
涸越雋門并求牽車獻烏丸帽女國金酒器胡王金馴
等物太祖賜以牽車者也

唐初貞觀八年吐蕃弄贊奉表求婚不許乃進兵攻破
党項及白蘭諸羌率其衆二十餘萬頓松州西境遣使
貢金帛云來迎公主又謂其屬曰若大國不嫁公主與
我即當入寇遂進攻松州都督韓威輕騎覘 反為所
敗邊人大擾太宗遣吏部尚書侯君集牛進達等率步
騎五萬以擊之進達先鋒自松州夜襲其營斬千餘級
弄贊大懼引兵而退遣使謝罪因復請婚太宗許之弄

贊乃遣其相祿東贊致禮獻金五千金其餘寶玩數百
事儀鳳二年令益州長史李孝逸雋州都督拓王奉等
發劍南山南兵幕以防禦之往劍南兵幕于茂州之西
南築安戎城以壓其境俄有生羌為吐蕃鄉導攻陷其
城遂引兵守之時吐蕃盡收羊同党項及諸羌之地東
與涼松茂雋等州相接南至婆羅門西又攻陷龜茲踈勒
四鎮北抵突厥地方萬餘里自漢魏以來西戎之盛未
之有也開元二十四年散騎常侍崔希逸為河西節度
使于涼州鎮守時吐蕃與漢樹柵為界置守捉使詔
以岐州刺史蕭昊為戶部侍郎判涼州事代希逸為河

州節度使鄯州都督杜希望為隴右節度使太僕卿王
昊為益州刺史劍南節度使分道經畧以討吐蕃仍令
毀其分界之碑二十六年四月杜希望率眾攻吐蕃新
城拔之以其城為威武軍發兵一千以鎮之其年七月
希望又徙鄯州發兵奪吐蕃河橋于河左築鹽泉城吐
蕃將兵三萬人以拒官軍希望引眾擊破之因于鹽泉
城置鎮西軍時王昊又率劍南兵攻其安戎城先于安
戎城左右築兩城以為攻拒之所頓兵于蓬婆嶺下運
劍南道資糧以守之其年九月吐蕃悉銳以救安戎城
官軍大敗兩城并為賊所陷昊脫身走免將士以下數

萬人及軍糧資伏等並沒于賊昊坐左遷括州刺史以華州刺史張宥為益州長史劍南防禦使主客員外郎章仇兼瓊為益州司馬防禦副使宥即文吏素無攻戰之策兼瓊遂專其戎事俄而瓊入奏盛陳攻取安戎之策上甚悅徙宥為光祿卿拔瓊知益州長史事代宥節度二十八年春兼瓊密與安戎城中吐蕃翟都局及維州別駕董承宴等通謀都局等遂翻城歸款因引官軍入城盡殺吐蕃將士使監察御史許寧遠率兵鎮守之上聞甚悅中書令李林甫等上表曰伏以吐蕃此城正當要衝憑險自固恃以窺邊積年以來蟻集為患縱有

百萬之衆難以施功陛下親行秘策不興師旅頃令中使李思敬曉諭羌族莫不懷思翻然改吝自相謀陷神算運于不測睿畧通于未然累載遞誅一朝蕩誅又臣等今日奏事陛下從容問臣等曰卿等但看四夷不久當漸摧喪德音纔降遽聞戎捷則聖與天合應如响至前古以來所未有也請宣示百僚編諸史策手制荅曰此城儀鳳年中羌引吐蕃遂被圍守歲月既久攻伐亦多其地險阻非力所致朝廷群議不合取之朕以小畜無知事須處置授以奇計所以行之獲彼我心歸我城守有足為慰也其年十月吐蕃又引衆寇安戎城及維

州章仇兼瓊遣裨將率衆禦之仍發關中彊騎以救援
為時屬凝寒賊久之自引退詔改安戎城為平戎城大
曆三年劍南西川亦破吐蕃萬餘衆五年五月徙置安
悉拓靜恭五州于山陵要害之地以備吐蕃大曆十一
年正月劍南節度使崔寧大破吐蕃故洪等四節度兼
突厥吐渾互變羌党項等十餘萬衆斬首萬餘級生擒
蠟城兵馬使一千三百五十人獻于闐下牛羊及軍資
器械不可勝紀十二年九月入寇坊州掠党項羊馬而去十
月崔寧破吐蕃望溪城十四年八月命太常少卿韋倫
持節使吐蕃統蕃俘五百人歸之十月吐蕃率南蠻衆

二十萬來寇一入茂州過汶川及灌口一入扶文過方
維曰堪一自黎雅過邛崃關連陷郡邑乃發集兵四千
人及幽州兵五千人同討大破之十二月崔寧復奏于
西山破吐蕃十萬斬首八千生擒九百人

德宗之世萬年韋臯為西川節度使城龍溪築西山堡
以納降羌臯以雲南蠻衆數十萬與吐蕃和好蕃人入
寇必以為前鋒四年臯遣判官崔佐時入南詔蠻說令
向化以離吐蕃之助佐時至蠻國 咀咩城其王異牟
尋忻然接詣請絕吐蕃遣使朝貢其年遣東蠻鬼王驃
傍苴夢衝苴烏等相率入朝南蠻自雋州陷沒臣屬吐

蕃絕朝貢者二十餘年。至是復通。五年，臯遣大將王有道簡習精兵以入蕃界，與東蛮故雋州臺嶽北谷大破吐蕃青海臘城二節使，斬首二千級，生擒籠十五人。其投崖谷而死者不可勝計。貞元八年，臯攻吐蕃于維州，敗之，獲其大將論贊熱，獻于京師。先是，鹽州城為吐蕃所毀，塞外無保障。九年，詔城鹽州，策虜且來，襲令臯出師，牽圍之。臯命大將董勛、張芬分兵出西山，靈關破峨和城，通鶴軍定廣城，踰滴博嶺，遂圍維州。搏栖雞攻下年溪等三縣，取劍山，屯焚之。南道元師論莽敦來援，與戰，破其軍，拔白崖，焚定廉故城，凡平柵堡五十餘所。

斬首二千八百級，乃城鹽州。由是西山羌八國酋長皆請入朝。十年，臯復敗吐蕃克我，和城獨維州不下。十六年，臯累破吐蕃一萬餘衆于黎州，隲州吐蕃遂大搜閱，築壘造舟，潛謀寇邊。臯恚挫之，于是吐蕃酋帥兼監臘城等九節度，嬰籠官馬定德與其大將八十七人舉部落來降。定德有計畧，習知兵法及山川地形。吐蕃每用兵，定德常乘驛計事蕃中，諸將稟其成算。至是自以扞邊失律，懼得罪而歸。心焉。十七年，吐蕃昆明城管麼些蛮千餘戶又降，贊普以其衆外潰，遂北寇靈朔，陷麟川。德宗遣使至成都府，令臯出兵深入西山，以紓其

顧臯乃令鎮靜軍兵馬使陳洎等統兵萬人出三奇路威戎軍使崔克臣兵千人出龍溪石門南路維保二州兵馬使仇冕保霸二州刺史董鎮等兵二千趨吐蕃繼州城中北路兵馬使邢玘等四千趨吐蕃柘雞老翁城都將高周王英俊兵二千趨故松州隴東路兵馬使元膺等復分兵八千人出南道雅黎篤路又令鎮南軍使御史大夫韋良金兵一千三百續進雅州經畧使路惟明等兵三千趨吐蕃通祖偏松等城黎州經畧使王有道兵二千人過大渡河深入吐蕃界篤州經畧使陳孝陽兵馬使何大海韋義等及麼些蠻東蠻三部落王苴

那時等兵四千進攻崑明城諾濟城自八月出軍齊入至十月破番兵十六萬拔城七軍鎮五戶三千生擒六千斬首萬餘級遂進攻維州救軍再至轉戰千里蕃軍連敗于是寇靈朔之衆引而南下贊普遣論莽熱以內大相兼東境五道節度兵馬都統郡物大使卒雜虜十萬來解維州之圍蜀師萬人據險設伏以待之先出千人挑戰莽熱見我師少悉衆來追發伏掩擊鼓譟雷駭蕃兵自潰虜衆十萬殲夷者半生擒論莽熱獻諸朝進臯檢校司馬中書令南康郡王御製紀功碑褒賜之臯治蜀十三年凡破吐蕃四十八萬斬首五萬餘級後

自南詔入寇敗杜元穎而郭釗代之病不能視事文宗太和四年以李德裕檢校兵部尚書成都及劍南西川節度副大使知節度事管内觀察處置西山八國雲南招撫等司德裕乃大葺關防繕完兵守又遣人入南詔求其所俘工匠得僧道工巧四千餘人歸成都扶殘奮懦皆有條次成都既南失姚協西亡松羅由清溪下洙水而左盡為蠻有始韋臯招徠南詔復雋州傾幣以結蠻好教之戰陣文法裕以臯破戎資盜養成癰疽第未決耳至元穎時遇隙而發故長驅深入跋剔千里蕩無子遣今廢瘼尚新非痛矯革不能刷一方耻乃創籌

邊樓按南道山川險易與蠻相出入者圖之左與吐蕃
密邇者圖之右其部落衆寡餽餼遠近曲折咸具乃召
習邊事者與之指畫商訂凡虜之情偽盡知之又料擇
伏瘴舊獠與州兵之任戰者散遺犂犂十三四士無敢
怨又請甲人于安定弓人于河中弩人于湖西由是
蜀之器械皆犀銳率戶二百取一人使習戰勿貸事緩
則農急則戰謂之雄邊子弟其精兵曰南燕保義保蕙
而河慕義左右連弩騎士曰飛星鷲擊奇鋒流電霆
擊突騎撓十一軍築伏羲城以制大渡清溪關之阻作
禦侮城以控榮經犄角之勢作柔遠城以扼西山吐蕃

復邛徠關徙雋州治臺登以奪壘險要簡去屬兵羸弱者四千餘人復募少壯得千人募北兵得千五百人與土兵叅居轉相訓習日益精練初蜀人多鬻女為人妾德裕為著料約凡十三而上執三年勞下者五歲及期則歸父母以繁生齒威惠大振太和五年吐蕃維州將悉怛謀以城降維距成都四五百里因山為固東北由索叢嶺而下三百里地無險走長川不三千里苴吐蕃之牙異昔戎之以制虜入者也其地南界江陽岷山連嶺而西不知其極北望隴山積雪如玉東望成都若在井底一面孤峯三面臨江是西蜀控吐蕃之要也至德

後河隴陷蕃唯此州尚存吐蕃利其險要將婦人嫁與此州閭者二十年後婦人生二子成長及蕃兵攻城二子內應其州遂陷吐蕃得之號曰無憂城貞元初韋皋鎮蜀經畧西山八國萬計取之不獲至是悉怛謀遣人送款德裕疑其詐遣人送錦袍金帶與之託云候取進止悉怛謀乃盡率郡人歸成都德裕乃發兵鎮守聞之于朝時牛僧孺沮議言吐蕃之境四面各萬里失一緱州未能損其勢比來脩好約罷戎兵中國禦戎守信為上彼若來貢曰何事失信養馬蔚茹川上平涼州坂萬騎綴迴中怒氣真辭不三月至咸陽橋此時西南數千里

外得百維州何所用之徙棄城信有害無利此匠夫所
不為况天子乎上以為然詔德裕以其城及悉怛謀等
悉歸之吐蕃僂之于境上極其慘酷德裕終身以為恨
會監軍使王踐言入朝盛言悉怛謀死拒遠人向化意
帝亦悔之武宗朝召僧孺出為淮南節度德裕面奏曰
臣在先朝出鎮西蜀其時吐蕃維州首領悉怛謀雖為
雜虜久樂皇風將彼堅城降臣本道臣尋差兵馬入據
其城飛章以聞先帝驚嘆其時與臣不足者望風嫉臣
臣遽獻疑言上罔宸聽以為與吐蕃盟約不可背之
必恐將此為辭侵犯郊境詔臣還却此城兼執送悉怛

謀等令彼自戮復降中使迫促送還昔白起殺降終于
杜郵致禍陳湯見徙是為郵支報仇感嘆前事愧心終
日今者幸逢英主忝備台司輒敢追論伏希省察且維
州據高山絕頂三面臨江在戎虜平川之衝是漢地入
兵之路初河隴盡沒此州獨存吐蕃潛將婦人嫁與此
州門子二十年後兩男子長成窈窕開壘門引兵夜入
茲陷沒號曰無憂因併力于西邊遂無虞于南路憑陵
近甸宵旰累朝貞元中韋臯欲經畧河湟湏以此城為
始盡銳萬旅急攻累年吐蕃愛惜既甚貴舅論莽執
未援雉堞高峻臨冲難及于層霄鳥徑屈盤猛士多廢

于碣石莫展公輸之巧空擒彼將而还及南蛮負恩掃地驅劫臣初到西蜀衆心未安外揚國威中輯邊備其維州執臣信令乃送款與臣告以須俟奏聞所冀探其情偽其志怛謀尋率一城之兵衆并州印甲仗塞途相繼空壁歸臣即大出牙兵受其降礼南蛮在列莫敢仰視况西山八國隔在此州比帶使名都成靈語諸羌久苦番中征役願作大國王人自維州降後皆云但得臣信牒帽子便相率内属其蕃界合水棲鷄等城既失險阨自須抽歸可減八處鎮兵坐守千里舊地臣見莫大之利乃為恢復之基維具奏聞請以酬賞臣自與

錦袍金帶顯俟詔書且吐蕃維州未降已降一年猶圖魯州以此言之豈守盟約况臣未嘗用兵攻取彼自感允來降又沮議之人不知事實犬戎遲鈍土壙人稀每欲乘秋犯邊皆須數歲就食臣得維州踰月未有一使入疆自此之後方應破胆豈有慮其浚怨鼓此游詞臣受降之時指天為誓寧忍將三百餘人性命棄信偷安累表上陳乞垂矜赦荅詔嚴初竟令執還加以体被桎梏昇于竹畚及將就路冤叫呼天將吏對臣無流涕其部送者便遭蕃師訛誚曰既以降彼何須送来乃却將此降人戮于漢界之上恣行殘害用固携離乃至擲其

嬰孩承以搶禦臣聞之楚靈誘殺蛮子春秋明凱周文
外送鄧叔簡冊深鄙况乎大國負此異類絕忠款之路
快兇雲之情從古以來未有此事臣寔痛恚怛謀舉城
受酷由臣陷此無辜乞慰忠魂特加褒贈帝意傷之尋
詔贈恚怛謀右衛將軍

初贊皇西南作西南備邊錄其序畧云吐蕃開釁河隴
失險締從南詔協以謀我并絡坤維我圍孔棘守臣韋
臯鑿清溪道要結蛮好犄鹿効順乃募集事狀為卷十
七質幣結轍闔戶誨盜爰命德裕改紀其政乃建籌邊
樓立雄邊子弟作伏羲禦侮柔遠三城以扼虜衝猶慮

敵去而備弛也凡兵將糧械之數城鎮種落之名歲計
經用之月誨求利病輯為一書諸郡虛寔外夷情狀條
分縷析燦如指掌創立陴壘咸以朱書圖之仍摠繪小
圖表之首卷焉按備邊錄第四卷叙維州本末尤詳唐
末吐蕃衰弱種類分散入內屬者謂之熟戶餘謂之生
戶薄示羈縻而已宋時朝貢不絕其首領喃廝羅始居
鄯州浚徙青塘即青塘嶺也青羌所居矣宋史吐蕃青
羌首領奴兒桔等為邊害十餘年制置使苗正以計禽
殺之盡殲其党趙汝愚代為制置使奴兒桔第三開復
叛汝愚懸重賞以問群蛮三開不能孤立憂汝愚

以定責羌功加秩即此種元憲宗始于河州置蕃宣慰司都元帥府云

保縣志云出縣循南岸行一日又北渡大江至雜谷安撫司可八十里又十里為無憂城故址尚存按雜谷即古維州唐太和中陷于吐蕃其首即悉怛謀種矣

國初有阿漂者以捍虜功授勅印為襍谷安撫同知歲輸薄糧于維州蕃倉三年一貢其地有上碛下碛去無憂城百里去縣倍之前臨沱水後倚高山南接三姐西接孟董南抵達思北抵東布又東至八稜碛與韃虜密迓歲終叢蕃兵萬餘備糧械入碛防守至次年除夕更

班保邊教寧以雜谷為之保障也達思蠻長官金川禪師及打刺兒草坡六寺龍山以西諸寨以隸焉

達思蠻長官司在雜谷西五十里其先嚴泰與河漂同功給印信授為長官

寰宇記云隋開皇六年以石門鎮追曰狗羌故于金川鎮置金川縣唐武德七年以屬維州貞觀初廢三年復置按金川寺其故處也寺僧巴橐監藏及莽葛刺以有戎行得稱蕃都綱永樂初黃毛韃犯界金川僧拓麻喇防禦有功事聞賜號演化禪師及勅命銀印俾其徒世守焉地居雜谷安撫之東管十五寨東八至八碛稜西

至保縣南至稜城百五十里後漸衰弱見駟于雜谷遷其族于董卜界上志云教場是金州寺地未詳打喇免寨土舍居威南路在文鎮河西先曾糾黑虜夷為邊害正德間歸順奏准納貢頒賜勅書冠帶無印信遇貢赴谷起文又有只臺塞蕃

保志曰西北生蕃有孟董十八寨三國孟獲董卜之裔也謂之孟董蕃亦名董卜韓胡唐時隣君董臥庭等求內附處其衆于維壩等州居小鐵圍山去縣可七八日程東抵雜谷入稜碕模坡河在東如卜河在北即古之孫水也南流雅州以牛皮為船既渡則曝皮于岸上

候乾復用為永樂八年降附進貢授宣慰使司都指揮同知貢道有三一由雜谷入稜碕出保縣一由清溪口出崇慶州一由靈關出雅州近與雜谷不睦故由直雅安

又曰松茂威疊大勢如一身然松潘首也疊溪項與喉也茂州腹也東之土門西之威與汶保其手足也狀餘皆在江內惟保獨居江外縣以東為舊番即箭上里之編戶叛去者地土相連樵採共路懷異志而漏華情莫此若矣又云縣北獫狁二股一路為水田星上龍山等寨向背不常一路為近縣玉山十二寨稍易馴正北

野番有梁荒稜城五十餘寨直連松州黑水號為野營
國初御史大夫丁玉用色銀鑄錠以誘之即此夷也
維州志云白狗嶺與大雪山連後有白狗羌居之寰宇
記曰白狗國者西羌之別名與會州連接勝兵一千唐
武德六年有使朝貢開元二十九年十月白狗國四品
龍官蘇唐封及狗川五品龍官薩阿封等至京各賜
金紫玉帶以遣之貞元九年七月其王陀羅忽與女國
等詣劍南西川節度使內附韋臯詔授試太常卿魚保
州司馬至今子孫承襲其爵云按白狗國女國俱在西
山八國之數韋臯使御魚節制西山八國即此也

四夷考曰維州路生蕃最多有色名可考者曰孟董梁
黃稜城月上星上龍山龍溪大寺小寺等寨設一關六
堡以戍之關曰鎮夷堡曰保縣曰新安曰乾溪曰西平
曰壩州曰坡底而坡底附近龍山竹大打寺小寺蒲窠
太子憤等寨而龍山最强舊有龍山戎有城唐書廣德
元年吐蕃陷維州龍山城是也

壩州堡附近龍溪卜南木上諸寨與北路黑苦三姐生
番相通每歲耕獲既有蓋藏輒以礪兵劫奪為事按即
保坭蠻也方輿紀云威州保霸蠻者唐保霸二州天寶
中所置後陷沒苗董氏世有其地與威州相錯因羈縻

為嘉祐熙寧中常請朝命政和初知成都龐恭孫建言
開拓置官吏廼以保州地為祺州霸州地為亨州梭其
首刺史團練使 按宋史董氏世知保州太平興國六
年保州刺史董竒歿以其子詔重繼之又云董仲元者
襲職二十餘年安靜無事嘉祐中益州軫轄司表其善
撫蛮夷乃真命為刺史其時有鷓州亦遣人供馬鷓州
未詳疑即古定廉縣今之金川寺故史謂西南邊地有
鷓州保州矣

回夷風俗記云維州諸番日務射獵夜宿碉房炙羊膀
以下吉凶分善惡以為黑白以戰死為善終以相殺為

厮打父子兄弟大則讐殺轉眼相背不知骨肉有大小
姓猶言大小族也董卜金川俱屬小族雜谷達思俱屬
大族志云其生一產雙子乳右者為小又云射旄牛者
為大射綿羊者為小二姓相間而居丁大夫王克復其
地始分之蓋使犬牙相制云且 歲時不用官曆知歲
時者為端公如辰年則畫十二龍或臥或行因形而推
之他像亦然番僧依佛經推算日月虹及甲子建除毫
厘不差大率以十月為一歲 嫁娶富者以猪羊毛毡
布疋粟麥為礼其賂裝資必須生子之日數人俟于路
口其女潛出要至其家方焚香宰牛羊會親 人死則

坐尸于水架上置之倉舍衣帽弓矢俱如生佩服端公
咒經獻以猪羊用火燒之 男子剪髮止面其頂髮下
垂服用竹力麻不穿褲不洗面嬪人俱編髮如縷飾以
海巴琿環

茂州華陽國志冉龍國漢時苻以東北君長十數冉駝
最大武帝元鼎六年所開以為汶山郡至宣帝地節三
年夷人以立郡賦重帝乃省并蜀郡為北部都尉其山
有六夷七羌九氏各有部落其王侯頗知文書後漢靈
帝時復分蜀郡北部為汶山郡蜀建興十年汶山平康
夷反姜維討之始服寰宇記曰石 冉隴夷人所造者

十數文山巖之間往 有之

宋史茂州羌蠻地方數千里舊領羈九州皆蠻族蠻自
推一人為州將常在茂州受處分舊志無城惟植鹿角
蠻以昏夜入州掠人畜貨賣遣將州往贖之習以為常
宋神宗熙寧八年范百常知茂州民請築城既而蠻酋
訴稱城侵其地乞罷築百常不許九年三月始興工靜
蠻數百奄至百常率州兵擊斬數人蠻乃退百常遷民
入牙城明日蠻數千人四面焚鹿角及廬舍引梯衝攻牙
城矢石雨下百常恚衆乘城拒守二酋長為木偶所殺
蠻兵乃却茂州南有雞宗閣通永寧軍北有隴東道通

綿州皆為蠻所據百常募人間道詣成都又書木牌數百投江中告急蜀蠻兵救之蠻始圍解誓和自是蠻人稍定百常亦以築城生患坐奪一官既而生羌合羣蠻復至相距七十日詔遣內押班王中正將陝西兵來援入恭州宕州誅殺頗衆蠻遂降政和五年有直州將鄧永壽陽延俊董承有等各以地內屬詔以永壽地建壽寧軍延俊承有地置延寧軍然與亨祺二州皆非扼控之所未幾皆廢

一統志云國朝設茂州以統羌民設茂州衛以統軍伍軍居城內民居城外羌凡和誓輸牛羊棘耒耜各一乃

縛劍門于誓場酋豪皆集引于劍門下過刺牛羊豕血軟飲之掘地為坎縛羌婢坎中加耒耜及刺于上投石擊婢以土埋之巫師詛云有違誓當如此婢

土夷考云茂州東路生番白艸最强大而白草又與松潘黃毛韃虜相通桃紅青片板舍次之白苦水磨岐山又次之有把守官轄桃坪神溪夾山等凡七堡關

桃坪者去白艸青片諸番不四五十里志謂古桃關也見水經注閬通西城之路北當風穴一二里間晝夜沙石飛揚不息寰宇記云故桃關在汶南入蠻界公私之路俱從于此有繩橋渡江認守桃坪者為隴木司

隴木頭長官司茂之隴木里也國初以酋長歸附授承直郎世襲長官喊常貢馬二疋所屬玉亭神溪十二寨俱為編氓有保長統之

又有靜州長官司茂之靜州里也襲官貢馬與隴木同正德間與岳希逢節孝為亂攻茂城斷木道七日節貴弟車刀潛引水以活我軍事平使車平襲職管法席挾桃濬入寨編戶為氓有保長統之認守北定門至関子堡按靜州即唐之志唐 宋史曰塗靜當真時飛宕恭等九州蠻皆羈縻州也環茂州而居州不過數十里而已按唐茂州都督府羈縻州九靜州其一已見前矣維

翼二州後改為正州即今疊溪所也第其名與宋史不同附載之以俟考焉 塗川唐武德元年臨塗羌歸附置領臨塗端源婆覽三縣貞觀元年州縣俱省三年又分茂州之端源戍置塗州縣有端源臨塗志隣三縣與州同置 炎州貞觀五年生羌歸附置西封州八年改為炎州縣有大封慕仙義川 徹州唐貞觀五年西羌首領董州貞歸化置縣有文徹俄耳文進 向州唐貞觀五年生羌歸化置縣俱有左向二 冉州本徼外歛才羌地貞觀六年置西冉州九年去西字縣有冉山磨山玉溪金水 穹州貞觀五年生羌歸附置西博州八

年改為穹州縣有小川徹當壁川當博恭耳 符州貞
觀七年白狗羌降附置西恭州八年改為符州縣有遂
都亭勸北思 恭州開元二十四年分靜州廣平縣置
恭州仍置北恭烈山二縣天寶元年改為恭化郡乾元
元年復為恭州本屬隴右道後割屬劍南道其屬縣有
和集博恭烈山

土夷考曰茂州南路生番惟曲山三寨界在西南兩路
之間稱強惡餘皆軟番有把守官轄雁門文鎮七星宗
渠四關堡河以外則屬岳希蓬也

岳希蓬長官司國初歸附賜罷長官三年貢馬二疋正

德間長官坤卜作亂伏誅使其弟坤元罷職管波西水西
渴、勒都等七寨隸茂州衛當差編戶于州水西里有
保長統之認守勒都龍嘴等地方

土夷考曰茂州北路有長安撫司其先曆曰寨首也國
初歸附屢有從征功賜勅印世為長寧安撫司月俸四
石三年一貢久未罷官使土舍護印而已姓蘇氏官鑿
溪章貢等六寨有把守官轄長寧寔大韓胡椒園松溪
等八關堡 長寧堡寔大關附近巴豬五族及大小曆
日稱最强悍 韓胡堡附近恰列寺韓胡碓水磨瀆等
寨而恰列寺皆番僧也原給有勅書三年一貢 椒園

郡國利病書
卷之六
堡附近後海烏都及河東之法帟挿共六寨俱靜州屬
羌也往來茂地貿易與居民伍 松溪堡附近黑苦七
族番衆二千有奇嘉靖間攻圍堡城絕我餉道要我重
賂乃解至今尚歲費撫賞四百金有奇
經畧志云正德十三年巡撫都御史宋滄克平壩底白
草諸寨諸夷猷侵地二千餘頃又克平茂州雞公寨十
五年長寧等處深淺諸寨番蠻聲言復仇求索賞需
兵備副使朱紉督同叅將游擊將軍提兵搗巢擒其首
惡餘党俱以次降年例賞需盡行裁革至今西陲安靖
諸蠻不復弄兵開邊隙矣

余分守川西詢諸有司議戍軍曰夫戍軍之設蓋謂邊
地空虛人烟稀少故令漢彭等處抽丁充戍其法
誠為至善然歲久月易其中有當調停者何也戍軍每
年九月撥發十月到邊往々非死則病非病即逃毫無寔
寔用試言其故蓋漢彭等處風氣溫和即冬無霜雪而
蔬菜俱備茂疊寨垣風沙慘烈雖夏不消冰而百物不
產以故戍軍到邊寒煖不合飲食不調多生疾病當有
司促迫上道哭別父兄妻子若永訣者至殷寔之戶強壯
壯之丁多有轉展規避惟無告窮民不獲已就列或又
閭戶共產一乞丐無賴之徒以充數比及到邊身無完

衣腹無飽食囊無半粒手無寸鉄奄奄扶杖而行致使
番夷倚山而咲曰戎軍來也病者病死者死邊隘曾不
得借其一臂之力嗟似此景象在安常處順猥云有
餉有兵倘一旦羌夷竊逞而欲其斬將搴旗捷伐用張
得乎是至苦者莫如戎軍至無用者亦莫如戎軍也然
則奚術而可亦惟是裁省抽發召募土著乃為常勝之
兵焉何也茂疊不產五穀不養蚕桑人所為命者惟恃
軍餉耳且如五口之家須應軍二名方得温飽不然而應
軍一名且見菜色如無軍可應則無生可度動見逃竄
如今之灌郫漢廣往有茂疊逃民蓋以此也倘以職

言為不謬將戎軍之糧召募土著之民人有糧人有
可兵不出三年逃避者必回故里地方之集聚日益衆
邊寨之軍兵日益精在平常無事足以壯國威苟一旦
臨戎則人自為家自可守可必其用命在內地無戎
軍之苦在邊庭有敢勇之卒竊思羌番雖狡亦無所用
其謀矣職書生也不敢言知兵但此明白易見斷乎
其可行者通變宜民是在今日耳隨經移會該道轉行
成都府茂汶保灌等州縣回衆間適余署司篆看得戎
軍之議或因或革非止一次每盈庭不決者蓋由行月
二糧全改半改未得其肯綮也何則月糧者祖軍之額

不可移動者也行糧專為更番戍守設耳若免其戍邊而不動其月糧則人皆樂從矣且衛所得裕差撥之役軍戶永免津貼之累而所利更廣矣查威茂一帶班軍以三十六七等年計之各該一千二百餘名折支司府民屯寔米并布花銀共五千五百二十餘兩此其大較也合無比松邊例裁去班軍前項銀兩支數該邊自行召募每名工食每日給銀二分共募兵七百七十名與主軍分任地方差使不得紊亂仍附官兵會計之後請數不得別立名色增補是尺籍雖稍虧而邊方得寔用也時如議行之

疊溪古氏羌地漢為蠶陵縣屬蜀郡晉屬汶山郡後周置翼斜郡隋初廢郡以縣屬會川大業初屬汶山郡寰宇記唐武德元年復改汶山郡為會川領翼斜翼水左封凡三縣其年即以三縣置翼州五代至宋元皆為羌人所據不置州縣 明朝洪武十一年平羌始置疊溪右千戶所隸茂州衛二十五年改守禦軍民千戶所其地東西廣六十五里南北袤九十五里東至鼈牛山五里西至黑水生番六十里南至茂州界三十里北至松潘界六十五里

圖經性獷勇悍不習詩書近漸染教習尚衣冠遠者

不通漢語衣皮褐裘不棺而火化剛飢寒疊石為礫以居所名本此其土產鼯牛毛毯酥油射香、豬白密犏牛馬雞 其山北有蠶陵東有犛牛南有排柵東北有雲峯各去所城五六里城西三里即漢江也源出松州與黑水合流入茂州城南有玉津泉甃以鍊瓦接引至城下居人汲之不竭有古蹟兩臺今為觀在治南有石輪寺沿崖皆佛相志云唐貞觀中李將軍廣所鑄也在治北四里

廢翼州城在治南寰宇記云唐武德元年置取郡南翼水為石六年自左封移州治于翼斜咸亨三年署都督

府移就悉州城內上元二年罷都督移還舊治天寶元年改為臨翼郡乾元二年復為翼州

廢蠶陵縣在治北漢治蠶陵縣屬蜀郡莽改為步昌也寰宇記衛山縣本漢蠶陵縣地註漢書蠶陵古城在翼州翼水縣西有蠶陵山隋改為翼斜縣治七頃城唐貞觀十七年移里于七里溪二十三年以英國公李世績為疊州都督天寶九年改為衛山縣又曰翼水縣亦蠶陵縣地隋初置取縣西南翼河為名按後州之龍水縣隋改翼水、在所治南五十里一出松潘一出黑水翼如也即汶江矣

唐志州 城在治東南三十里唐顯慶三年割左封縣
界內悉唐川因立為志州領志唐左封識白三縣以羈
縻羌人其首領有董係北射任刺史自後射卒以左封
縣令董俱志凍任刺史無勅以父死子繼咸亨元年移
治左封載初元年移治匪平州

廢左封縣址同志州寰宇記云左封縣本屬翼州在當
州東南四十里唐顯慶元年乃以縣治志州焉

廢歸城縣唐垂拱二年置

廢真州唐天寶五載分臨翼郡之昭德雞川兩縣置昭
德郡乾元二年改為真州取真符縣為名其一曰真符

縣唐天寶五年分雞川昭德二縣置真符縣州所治也
其一曰雞川縣唐先天二年割翼州翼水縣置天寶五
年改為真州其三曰昭德縣舊識白縣屬志州天寶元年
改屬翼州仍改名昭德縣五年改屬真州按通典有雞
川昭德二縣唐書云開生獠新置即不述年月今茂州
雞宗開名本此地亦相近

四夷考曰壘路生番最惡而五色豬為尤甚牛尾麻搭
楊柳麥兒次之凡四十八寨其地南連黑苦西通黑水
北接松潘頻年虜去漢人鬻賣入黑水加兵征之即逃
入黑水黑水盡廣饒之地遠近莫知所紀極也

志云疊溪千戶所領長官司二曰疊溪司在治北一里
曰欝即在治西十五里疊溪郁氏洪武十年以土酋歸
附世其官永樂中頒給印信除流官吏目一員九三年
貢馬四匹今長官都孟賢轄河東熟番八寨皆大姓及
馬路小關七族土舍郁從智轄河西小姓六寨此六寨
素梟黠地土廣遠牛羊稞馬麥露積名雖熟番與生番
等耳

欝即長官噉保萬曆十八年與黑水招坪攻我新橋明
年伏誅先是漢關墩附近勒骨諸小姓屬于欝即至是
改屬郁氏

新堡附近為已豬大寨衆逾千數其人形如魍魎惟喜
黠盜雖受歲賞月糧糜耗而已自嘉靖二十三年以來
屢經渡河虔劉我官軍攻掠我城堡稔惡不悛殺將貫
盈議者欲于舊關腦搭橋進兵及馬路堡後長寧沙壩
潛師遠其後上下夾攻可大創也

永鎮堡附近為牛尾寨萬曆八年十二月與麻搭濟思
頗肆殺掠十四年征之逃入黑水獻出番牌投降埋奴
為誓乃免

太平堡附近為楊柳海河西強種也與松滿之大小耳
別同枝向稱滑梗萬曆十四年征之不服後四年乃糾

松坪白泥黑水三千餘畝同陷新橋十九年復大征亦
埋奴求免

西邊志云灌縣獠澤關景泰七年立左董卜韓胡可千
里畚民至關市易唯大黃茶藥而已去關七十裡為惹
龍關加渴瓦之地也

加渴瓦寺亦董卜韓胡支派正統間調征草坡宣慰司
遣僧鎖南列思巴來赴賜號崇教翊善國師給勅印使
分管摩多集塔藏裏舊事等十三寨都綱麻喇者成化
間孟董梁黃之亂調發協征遂就汶川塗裏山巔居焉
國師久未承襲以土舍護印而已獠澤等關是其認守

汶路生畚惟草坡驚點有三塞在河西山外一徑通董
卜宣慰一徑通孟董梁黃向以假道騷動十八年征之
始震警輸蕎菽于汶川聽約束于寒水矣

寒水土巡檢司高氏其先曰銀兒直隸霸州人洪武七
年授職防守河西住蘇村寨三年貢馬二匹正統七年
草坡攻汶川司印為所劫景泰間重領授之調征龍溪
卜南諸寨屢立戰功隆慶間草坡復攻破蘓村寨遂移
住河東

龍安府 青川 石泉 安縣

安綿道開府綿州轄龍安青川石泉綿州諸將領守備

君國和... 指揮一人比都指揮林統駐石泉而龍安叅將同城以居

龍州古羌氏地漢曰陰平道註曰有夷之地曰道如剛氏道旬氏道之類是也北部都尉治此永平後始稱郡自後或稱江油或稱平武或曰龍州或曰龍門或改靈應郡或改政州時代不同因革亦異宋景定間臨邛人薛巖以進士來守是州捍衛有功得世襲焉家譜為戰國薛居州之後也國初其裔薛文勝歸附乃授知州時千夫長隴西李仁廣提領官高郵王祥給我餉饋蜀平賜李州同知王州判官宣德中以征松潘功陞州為宣

撫薛氏世宣撫使李為副使王為僉事各統土兵五百分守白馬白草木瓜三縣嘉靖末年薛兆乾謀逆伏誅遂改宣撫司為龍安府割成都之石泉保寧之江油及青川千戶所隸焉隆北乾庶弟襲土知事王氏李氏俱罷土通判列衛分府守如前仍移小河叅將于府城彈壓之附郭平武縣萬曆十九年始設也江油地雖腹裡然寔糧運之咽喉矣

益州記曰江水自白馬嶺巡行二千餘里至龍涸又八十里至陵西縣又百二十里而至北部北部即龍州也白馬嶺即白馬峯地隸王通判在府正北三百里北通

階文西抵漳臘其生番獠黑人延袤數百里碉房不計有名色可舉者凡十八寨之多不過四五百人少可百人而已設有散牌摠牌等名因以約束之番僧番舍諸獠以誘化之法甚密也嘉靖元年白馬跳梁用兵五千分五路而進一由鍊龍堡一由黃平關一由三舍堡一由北雄關一會兵陝西由階文八大創之而喘息聽命矣

白革番隸李通判在府西南四百里東抵石泉約七十里西抵南路生番南抵茂州番北抵平武縣境蓋唐吐蕃贊普遺種也上下白草凡十八寨部曲素強恃其險

阻往剽奪為患嘉靖二十五年大征用兵三萬七千一由龍州一由石泉一由霸底所斬獲甚多事平增獲溪大魚永平奠邊諸堡革撫賞斷鹽茶予以白旗永塞入龍之路于是埧底河西風村等十一寨永平河東北草等十七寨周數百里男女四千餘人相率來降許其畜髮頂巾送子讀書習學華語歲輸糧蠟為氓編走馬嶺一帶為十村由平一村以至平十村也射溪海一帶為八村自一化以至八化村也村立一長即舊番之號又有風村嶺等三十寨尚存舊名亦同時歸順者事在萬曆十七年

木瓜畚隸薛知事在府上游近小河千戶所境土迫促種類不蕃雖有五寨約男女不上二三百人先是於薛氏受其歲賞嘉靖二十三年勾引白草畚反為之鄉道事平止許歲至小河領賞不得渡大魚關

貴州千戶所白馬畚之後路東抵白水陽平關陝西寧羌州界西通白馬路轉古城驛而抵龍安南至椒園堡叢林密菁多盜賊北通青塘嶺直達階文寰宇記後魏之馬盤縣也有馬盤山高三千三百丈其形如馬盤旋而上隋改馬盤為青川縣圖經云清水出啼胡山濶五丈東流入利州界其水清美亦云啼胡水矣志作醍醐

蓋美名之圖經曰青川東三百四十里為白水江鄧艾伐蜀嘗作浮橋于此按華陽國志平武縣有閔尉自景谷百步道徑江油左擔出涪鄧艾伐蜀道也

志云所十里有大雄山峻極出于雲表即此雄關也近又設閔牆垣營壘完固堪守稍前為瓦舍壩乃敦畚保之住種地其種怯弱易馴按廣輿考有思曩安撫司設于此矣

石泉北隣土永平西連青岡埧底諸畚最稱强悍埧底守備駐劄縣城復土堡在縣西北稍南為青岡各相去十里許介二堡間有青洄口路通埧底河東河西白

草青片諸生熟夷隸石泉守備提調 東二十里為永平堡設在山崖形勢陡峻控制白草諸番隘口永平西三里為奠邊關之南里許為火草坪火州北十五里為萬安東二十里為嘉定俱永平把守指揮提調 北四十里為埧底其地東抵通寧西連白草南距石泉北通青片堡其南十五里為石板關東十五里為石泉堡又五里為白印墩埧底把守指揮提調 大印堡設于山阜巍然天險亦白草番出沒之要路也堡西二十里為茆堆又五里為山茅山茅東一舍為徐塘徐塘北一舍為伏羌伏羌北兩舍為大方關之與大印相首尾矣故

屬大印把守指揮提調

按縣東至涪城西極綿竹南通羅江北達石泉境內雖無夷族然而迫鄰睢水曲山疊溪諸關堡則天池大壩白草青片等寨亦其接壤也曲山關介在當縣石泉平武三路睢水關為當縣綿州道中之地面山負水平衍沃饒關西一舍名綿堰堡綿水發源于此關東一舍名疊溪堡乃白草番後路形勢孤懸安綿倚為保障設有官軍鄉勇屬睢水關把守提調

卷之六
五

卷終



